

萬 有 文 庫

第 二 集 七 百 種

王 雲 五 主 編

衛 藏 通 志

附 校 字 記

商 務 印 書 館 發 行

志 通 藏 衛

記 字 校 附

(二)

書 叢 本 基 學 國

衛藏通志卷五

喇嘛

御製喇嘛說 教編卷首

乾隆五十七年十月二十三日。福康安等會奏。爲遵旨設立金本巴瓶。拈定呼畢勒罕。以興黃教事。查達賴喇嘛。班禪額爾德尼。爲黃教之宗。自宗喀巴流傳至今。凡達賴。班禪圓寂後。不迷本性。俱有呼畢勒罕出世。以衍其教。向係令吹忠等作法降神。秉公指認。是以化身示現。僧俗人等。悉皆信以爲真。歷輩以來。仰蒙天朝衛法興教。恩禮優隆。各蒙古部落。以及大小番族。俱憑吹忠作法指定。誠心敬奉。遠近皈依。是達賴喇嘛。班禪額爾德尼。轉世之後。其實在根基。向來遠近番民。數萬衆。總以吹忠作法降神爲敬信。竟有牢不可破之勢。然行之既久。其中妄指之弊。定所不免。卽如藏內各呼圖克圖內。仲巴爲前輩班禪之兄。哲卜尊丹巴呼圖克圖爲達賴喇嘛之姪。而丹津班珠爾之子。卽係三巴呼圖克圖之呼畢勒罕。族屬姻婭。遞相傳襲。誠如聖諭。竟與世職無異。各呼畢勒罕。既出於一家親族。不能使人無疑。恐將來達賴喇嘛。班禪額爾德尼之呼畢勒罕。若亦指認未真。於事殊有

關係仰蒙聖主振興黃教。頒發金本巴瓶一件。令將吹忠四人所指之呼畢勒罕姓名及生年月日。各寫一籤。貯於瓶內。對衆拈定。實足以防弊竇。而愜衆心。奉到節次諭旨。仰見我皇上釐定正教。撫馭外番。於因勢利導之中。寓循名責實之意。臣等實深敬佩。並敬向達賴喇嘛、班禪額爾德尼、濟甯呼圖克圖、大喇嘛、及吹忠等宣示聖諭。無不感激悅服。茲復欽遵訓示。公同籌議。嗣後拉穆吹忠、內噶、瓦東、薩穆葉等四人。俱令其熟習經典。試演降神之法。設遇達賴喇嘛、班禪額爾德尼示寂後。令吹忠等四人認真作法降神。尋覓實有根氣之呼畢勒罕指出者若干。將其名姓生年月日。各寫一籤。貯於欽頒金本巴瓶內。揀選熟習經典喇嘛。虔誠誦經七日。傳知各呼圖克圖喇嘛等齊集佛前。駐藏大臣親往監視。凡達賴喇嘛、班禪額爾德尼之呼畢勒罕。即仿互爲師弟之義。令其互相指定。如吹忠四人所指皆同。有一呼畢勒罕出世者。擬寫名籤一枝。另加空籤一枝。入於瓶內。如法誦經。若對衆掣出空籤。則名籤之呼畢勒罕並非確實。是以不爲佛佑。即別尋呼畢勒罕。另行籤掣。以杜吹忠等串通妄指之弊。籤上須寫清漢唐古忒三樣字。使大衆一望而知。不致爲所蒙混。至前後藏各大呼圖克圖之呼畢勒罕。亦令駐藏大臣。監同達賴喇嘛照例掣籤。方可定準。其餘如察木多、類烏齊等處呼畢勒罕。距藏較遠。所出之呼畢勒罕。非大呼圖克圖可比。向來不由藏地吹忠指認。仍照舊令其徒衆自行尋覓。再藏內向來誦伊羅爾經之處。即係大昭。臣等已親至大昭。揀擇寬敞。

經堂掃除潔淨。俟御前侍衛惠倫、乾清門侍衛阿爾塔錫第恭齋金本巴瓶到時，臣等卽行送往大昭內宗喀巴前供奉。並選派誠實喇嘛專司看守，以昭誠肅。等因具奏。奉硃批：另有旨。欽此。

十二月初一日，福康安等具奏：爲御前侍衛惠倫、乾清門侍衛阿爾塔錫第恭齋金本巴瓶來藏。於十一月二十日，敬謹齋到。臣等率同官員官兵及濟隴呼圖克圖率領各寺呼圖克圖、大喇嘛及噶布倫以下番目，遠出祇迎。達賴喇嘛感激聖恩，先期下山。在大昭等候。派喇嘛等各執香花幡幢，導引臣等與惠倫等恭送金本巴瓶於向來諷誦伊羅爾經之大昭佛樓上宗喀巴前，敬謹供奉。達賴喇嘛率領僧衆梵唄齊宣，極爲誠肅。並據達賴喇嘛稱：呼畢勒罕轉世，遞衍禪宗，關係鄭重。今蒙大皇帝振興黃教，惟恐吹忠等降神作法，指認未真，致有流弊。特頒金本巴瓶，衛護佛門，實已無微不至。我實感戴難名。嗣後惟有欽遵聖訓，指認呼畢勒罕時，虔誦經於大衆前，秉公拈定。庶使化身真確，宣揚正法，遠近信心。闔藏僧俗頂戴天恩，無不感激等語。察看達賴喇嘛等歡忭感頌情形，見於詞色。呈遞謝恩哈達一方，佛一尊，濟隴呼圖克圖呈遞謝恩哈達一方，佛一尊等因具奏。於次年正月二十四日，奉到硃批：好事，知道了。欽此。

五十八年二月十三日，和琳等具奏：爲西甯及科爾沁等處送到各呼畢勒罕，遵旨入瓶籤掣事。竊臣等前奉諭旨：遇有大小呼畢勒罕，卽在金本巴瓶先行試掣。茲有西甯送到遜巴呼圖克圖之呼

畢勒罕。並年班回藏。堪布囊素帶有科爾沁地方達喇嘛四人之呼畢勒罕四人。茲有一人送到。呼畢勒罕三名。又有三人。每一人各送到一名。現在送到之呼畢勒罕。共計九名。所有各呼畢勒罕。俱非大呼圖克圖。向來轉世。並不報明理藩院具奏。亦不由吹忠指認。惟將本處所出之呼畢勒罕名字。送交達賴喇嘛。班禪額爾德尼誦經指定。歷來俱係如此辦理。臣等伏思。欽頒金本巴瓶。今既供奉在藏。自應將送到之呼畢勒罕。各按名字人數。分別入瓶試掣。因先期令濟隆呼圖克圖等。帶同喇嘛於大昭宗喀巴前虔誠誦經。二月十一日。達賴喇嘛下山前至大昭。臣等親往監視。寫籤入瓶。公同抽掣。查遜巴呼圖克圖之呼畢勒罕。送來者共有三名。掣得策旺哲布丹之子。又達喇嘛羅卜藏多布丹之呼畢勒罕。送來者亦有三名。掣得烏珠穆沁地方第巴克之子。又達喇嘛羅卜藏丹津。羅卜藏達布凱。倫珠布班珠爾三人之呼畢勒罕。送來者每人祇各一名。是以寫名籤三枝。各配空籤一枝。分三次入瓶抽掣。其達喇嘛羅卜藏丹津及羅卜藏達布凱之呼畢勒罕。俱係掣得名籤。准其指認。惟倫珠布班珠爾之呼畢勒罕。掣空籤。自非確實。應令該地方另行尋覓。是日掣籤之時。自達賴喇嘛以下。僧俗環觀。皆稱大皇帝護衛黃教。將設立金本巴瓶。辦爲公允。臣等察看衆情。甚屬感激喜悅。傾心信奉。嗣後藏內吹忠指認之大小呼畢勒罕。俱照此籤掣。永遠遵奉。再查前奉諭旨。各蒙古地方所出之呼畢勒罕。俱於雍和宮設立之金本巴瓶內抽掣。此數呼畢勒罕。既送到藏內。

臣等遵卽試掣。嗣後西甯地方距藏較近。將所出之呼畢勒罕就近送藏。入瓶抽掣。此外各蒙古地方所出之呼畢勒罕。俱應由理藩院行文。令其將名字送京。在雍和宮金本巴瓶內籤掣。以別真僞。等因具奏。於本年五月初三日。奉到硃批。該部議奏。欽此。

三月初八日。奉上諭。西甯及科爾沁等處地方。送到各呼畢勒罕。入金本巴瓶試掣一摺。亦批交該部議奏矣。欽此。

五月二十六日。奉上諭。據和琳奏。吹忠等屢次試驗。實已計窮力竭。將來遇有應出之呼畢勒罕。遵旨擇有福相聰慧幼孩。歸入金本巴瓶掣定爲準等語。前因喀爾喀三音諾彥部落額爾德尼班弟達呼圖克圖圓寂後。其商卓特巴那旺札什。赴藏懇求降神批示。原令於中等人家找尋。詎那旺札什私送吹忠銀物。因而卽指圖謝圖汗之子爲呼畢勒罕。因命奎舒同札薩克喇嘛格勒克那木喀。赴喀爾喀地方另行找尋。奎舒等於該處屬下人戶。找得聰慧幼孩五名具奏。隨交雍和宮喇嘛念經。並派八阿哥及理藩院堂官。監同將其姓名生年月日。入瓶籤掣。掣得第五名之齊旺札布。奎舒來至熱河復命。回奏自找得五名幼孩後。俱令住在廟內。其餘四名俱各歸家。惟居末之齊旺札布不肯回去。又掣定後。那旺札什前製衣服坐褥一分。與齊旺札布不肯穿坐。另製一分給與。始行穿坐等語。可見呼畢勒罕原有根基。吹忠降神實爲妄誕。不足憑信。此一事殊爲奇異。甚愜朕懷。著將覆訊那旺札什及奎舒奏摺。並昨降諭旨。俱抄

錄發交和琳等閱看。將來藏內遇有應出之呼畢勒罕。和琳等當照此辦理。則從前聽從吹忠之積習。自無難永遠革除。欽此。

四月十九日。奉上諭。前因喀爾喀三音諾彥部落額爾德尼班第達呼圖克圖圓寂後。其商卓特巴那旺札什。有意營謀汗王子弟爲呼畢勒罕。代求達賴喇嘛。拉穆吹忠附會妄指。已分別治罪。並明降諭旨。通飭各蒙古番衆矣。本日據和琳奏。詢達賴喇嘛。稱那旺札什到藏時。向我問額爾德尼班第達的呼畢勒罕出在何處。我令他去問拉穆吹忠。他就赴吹忠處問過。吹忠批說。圖謝圖汗屬雞的兒子就是。我向來總據吹忠所說爲憑。就照向例。憑吹忠龍單上的話給他批了。並訊據吹忠尼爾巴敦珠卜達爾結供。那旺札什於五十七年復至拉穆廟內。求問呼畢勒罕究竟在於何處。吹忠降神龍單。批令於東方中等人家找尋。過了幾日。那旺札什來寺。又送銀五十兩。緞一疋。哈達一箇。向吹忠告稱。圖謝圖汗車登多爾濟之子。暨公凌沁多爾濟之子。俱是屬雞的。此二人內是否真實。並開伊等父母年歲。求其降神。吹忠卽於那旺札什所遞字上。批說。車登多爾濟之子屬雞的是真。呼畢勒罕等語。是卽該商卓特巴欲營求汗王子弟爲呼畢勒罕之明證。益可見此事之不可不徹底查辦矣。朕自乾隆八年以後。卽誦習蒙古及西番字經典。於今五十餘年。幾餘究心討論。深識眞詮。況本朝之維持黃教。原因衆蒙古素所皈依。用示尊崇。爲從宜從俗之計。初非如元人佞佛優禮喇嘛。致有冒罵者割舌。毆打者斷手之事。近因黃教之習。愈趨

愈下。蒙古番民等失其舊時淳樸之風。惟知牟利。罔識佛教正宗。不得不亟加整頓。是以製一金本巴瓶。派員齋往。設於前藏大昭。俟將來藏內或出達賴喇嘛。班禪額爾德尼。及大呼圖克圖呼畢勒罕時。將報出幼孩內擇選數名。將其生年月日名姓。各寫一籤。入於瓶內。交達賴喇嘛念經。會同駐藏大臣。公同籤掣。並於京城雍和宮內。亦設一金本巴瓶。如蒙古地方出呼畢勒罕。即報明理藩院。將年月姓名繕寫籤上。入於瓶內。一體掣籤。其從前王公子弟內。私自作爲呼畢勒罕。陋習永行停止。朕之此旨。原因各蒙古汗王貝勒等。既有世爵。可以承襲罔替。已極尊榮。何必又占一呼畢勒罕。又謀喇嘛之利。如此見小。罔知大義。將來必致謀奪財產。啓爭肇衅。滋生事端。方今國家威稜遠播。各蒙古札薩克。咸隸理藩院管理。遇有田產細故。俱爲之秉公剖斷。若任伊等牟利不已。久而或致爭奪相尋。成何事體。是朕之整飭流弊。正所以護衛黃教。厚愛蒙古人等。使其各關愚蒙。永除爭競。至佛法以虛寂爲宗。無來無去。故釋迦涅槃後。並未出世。卽宗喀巴闡演黃教。亦未出呼畢勒罕。達賴喇嘛。班禪額爾德尼。係宗喀巴之二大弟子。始世世出。有呼畢勒罕。轉世共掌黃教。相沿已久。從前五輩達賴喇嘛。及來京之前輩班禪額爾德尼。諳習經典。或尙能具有真慧。現在達賴喇嘛。年紀尙輕。姿質誠樸。甫學經卷。豈能直參上乘。先知一切。凡有求其指示呼畢勒罕者。惟憑拉穆吹忠之降神定奪。而吹忠不過如內地師巫之類。且內地師巫尙有用刀自扎。及舐刀吞劍。掩人耳目法術。今吹忠經和琳等。面加演試。授以刀劍。俱各戰慄。並師巫之不如。是其所

指呼畢勒罕。荒唐更屬顯然。乃番衆人等崇信已久。以其妄言休咎。小有效驗。遂傳神一時。竟有牢不可破之勢。此亦習俗使然。自不必急於禁止。前已頒發金本巴瓶於大昭供奉之宗喀巴前製籤。所有找尋呼畢勒罕一事。永遠不准吹忠指認。其番民推問吉凶等事。暫聽仍舊。日久吹忠法術不行。亦將自敗。總之大端。既得默化潛移。一切積弊。亦無難逐漸革除。至藏地出產較少。布達拉商上給與衆喇嘛養贍。及番兵口糧等項。需用繁多。所入不敷支給。向賴各蒙古番衆布施。以資用度。嗣後惟不准私指呼畢勒罕。其餘熬茶贍禮。皆在所不禁。朕方鼓勵蒙古等使之布施。但不可如那旺札什之用財營求。將汗王之幼子附會妄指。作爲呼畢勒罕。並如年前噶爾丹錫勒圖呼圖克圖之私遣徒弟。到土爾扈特地方。向人索取耳。從此各蒙古番衆等益當恍然於朕之掃除積弊。無非欲力挽頽風。振興黃教。保全伊等。俾安樂利。永息爭端。並非不令其尊崇佛教。不許布施達賴喇嘛。班禪額爾德尼也。所有辦理此事緣由。著再行曉諭各處蒙古番衆等。咸使聞知。共喻朕意。欽此。

五十九年正月二十六日。和琳具奏。訪得未出世之呼畢勒罕。遵旨派人尋找事。查自前年整頓藏務以來。皇上爲各呼畢勒罕皆出自達賴班禪二喇嘛親族及世家子內。積習相沿。致有逆僧沙瑪爾巴之事。頒賜金本巴瓶。供於大昭。入瓶籤掣。立法極爲盡善。臣等留心體察。並行文各處。訪問有無呼畢勒罕。以便遵旨試掣。總未見有呈報。緣衛藏地方。雖皆屬達賴喇嘛管轄。如察木多。類烏齊。

乍了。薩喀等處。各有呼圖克圖管理。一切事件。從不關白藏中。而各呼圖克圖中。又有紅黃黑三種。各行其教。各子其民。自去年臣等行文各處。令將所有呼圖克圖。無論大小有名無名。俱著將轉世輩數開列呈報。以憑咨明理藩院立案去後。昨據陸續報到。臣等查有察木多所屬甲拉呼圖克圖。喇色所屬覺喇澤小呼圖克圖。又藏喇借結呼圖克圖三名。皆已圓寂一二年。尙未出世。雖皆係極小呼圖克圖。如俟各該處自行呈送到日。再入金本巴瓶籤掣。設其所報。即係該呼圖克圖之親族世家子弟。妄指一二人。皆不可定。彼時方始駁飭。不但徒事周章。而是否係伊親族。亦無從查察。今臣等公同商酌。應即遵旨照認識額爾德尼班第達之例。會同彼處漢官。於圓寂地方之一二年所生之有福相聰俊幼孩內。各揀選四五名來藏。如法念經。入於金本巴瓶內籤掣。俟找尋到日。掣得何名。另行具奏外。並一體傳知各處。嗣後遇有呼圖克圖圓寂。即令隨時呈報。不必俟其出世。以憑一體辦理等因具奏。於本年四月十七日。奉到清字硃批。且如此試爲之。餘有旨。欽此。

奉

以下二件附

駐藏二位大人吩示。查達賴喇嘛並班禪現今共有幾輩。生長地方。父母姓名。圓寂年貌。

地名。某年差過堪布進貢。某輩某年蒙皇上賞過敕書。查明呈報等諭。奉此。今查得班禪頭一輩係宗克巴佛的徒弟。名叫克珠丹白尼嗎曲吉加勒布格勒巴勒桑。于木牛年生在後藏納堆降奪雄切窩地方。父名工噶扎喜。母名卜真甲木。于土馬年五十四歲圓寂。第二輩名叫竹白旺曲索諾木。

卻吉朗布。生在後藏野茹臧扎木溫薩地方。父母姓名並圓寂年貌找尋不出。第三輩名叫結竹白旺曲洛布藏敦欲竹巴。于木牛年生在拉魁溫薩地方。父名索諾木多爾結。母名扁宗幾。于火虎年六十一歲圓寂。第四輩名叫班禪洛布藏曲吉甲勒參。于火兔年生在臧絨連竹甲爾地方。父名撮結策忍巴勒角爾。母名撮結。于水虎年九十六歲圓寂。第五輩名叫班禪洛布藏夷喜巴勒桑布。于水兔年生在臧絨托布甲隊倉地方。父名沙不仲索諾木汪扎爾。母名澤丹卜癡。于火蛇年七十五歲圓寂。第六輩名叫班禪折布尊洛布藏巴勒丹依喜巴勒桑布。于土馬年生在臧野茹嚮扎喜孜地方。父名湯拉。母名甯達旺木。于鐵鼠年四十三歲圓寂。第七輩名叫洛布藏巴勒丹丹白尼嗎卻勒拉木結巴勒桑布。于水虎年生在後藏巴浪吉雄地方。父名巴勒丹登珠卜。母名齊墨甲木。現年十三歲。第四輩班禪洛布藏曲吉甲勒參在時。遇大清登基。達賴喇嘛並班禪會差堪布赴京叩喜。蒙皇上升旨。班禪洛布藏曲吉甲勒參。達賴喇嘛阿旺洛布藏甲木錯二人內。年輕者拜年長者爲師。學習經典。又蒙降旨。班禪並達賴喇嘛二人。每年輪流差堪布赴京進貢一次。自奉旨之後。按年輪流差堪布赴京進貢。直到如今。又第五輩班禪洛布藏夷喜巴勒桑布在時。于康熙五十二年內。蒙派欽差赴藏賞賜金冊。內註明將札什倫布各廟宇地方賞與班禪管理。不許別人侵占。又于康熙五十二年正月二十二日。蒙賞賜金冊金印。第六輩班禪折布尊洛布藏巴勒丹依喜巴勒桑布。

在時于乾隆三十年十月初四日蒙文殊菩薩大皇帝差阿思哈八人並札薩克喇嘛阿旺巴勒珠三等侍衛前來賞賜金冊一本重一百一十三兩所有金印係前輩班禪遺流奉到這樣旨意又于乾隆四十五年內蒙賞賜四體字玉冊玉印今年差赴京堪布名叫金龍堪布藍占巴夷喜達爾結係屬馬的現年四十五歲爲此具稟

九月十九日譯

查西藏現有世襲公爵二人、札薩克頭等台吉一人、頭等台吉二人、四等台吉一人、內阿里公諾爾布彭楚克于去年病故伊子承襲時原敕送部填名又削去公爵議給頭等台吉丹津班珠爾之舊敕送部更換俱尙未發還外其餘敕書謹敬譯漢呈閱

衛藏通志卷六

寺廟

謹案佛、西方之教也。藏地信佛誠事佛謹。歷數十年。其佛像曰沙迦圖巴、江賚孜格、曼殊舍利、雅滿達噶、德木楚克、騾子天王、瑪哈噶拉、達喇額、可邁達爾、阿玉錫等號。供奉石樓金殿。香燈朝禮。自打箭鑪至後藏。七千餘里。寺廟不可勝紀。茲自大小招布達拉、札什倫布至察木多、札雅、巴塘、裏塘、打箭鑪著名寺廟。隨地以志焉。

謹案前後藏至打箭鑪。各部落寺廟不可勝記。今按布達拉經簿及西域志所載。名最著者敘入。
布達拉

唐時藏王曲結

通經典之稱

松贊噶木布

唐書作弄贊贊普

好善信佛。頭頂納瓦塔葉佛。在拉撒地方山上。誦旺固

爾經。取名布達拉。爲西藏衆僧俗所瞻仰。每日焚香坐禪入定。不思他往。唐公主同巴勒布王之女名拜木薩。因藏王坐靜。恐有外侮。遂修布達拉官寨城垣。上掛刀鎗。以嚴防禦。其上藏王寢室。與拜木薩寢室。隔絕兩處。頂皆平坦。搭銀橋一道。以通往來。後因藏王莽松作亂。官兵拆毀布達拉。僅存

觀音佛堂一所。嗣經五輩達賴喇嘛掌管佛教。兼管民間事務。修立白寨。又有代辦事務之桑結嘉木磋。修立紅寨。及內外房屋。金殿佛像。相傳重修至今一百四十餘年。其地在北山之陽。五里平坦。突起一峯。高約二里。緣山砌平樓十三層。盤磴而上。其上有金殿三座。光彩耀目。金殿之下。有金塔五座。西殿有宗喀巴手足印。日久不化。爲達拉喇嘛坐牀處。金殿內供奉御容。率衆喇嘛誦經。

招拉筆洞寺

布達拉之西南。竦起一峯。其南山生下爲藏之峯。山北去布達拉里許。中建一塔。下通西行大路。其山上層樓四起。爲有行喇嘛坐靜處。其寺內喇嘛多業岐黃。

大招寺

大唐文武孝德皇帝撰。大蕃神聖贊普。舅甥二主。商議社稷如一。統立大和盟約。永無淪替。神人俱已證知。世世代代。使其稱讚。是以盟文即日留傳之於後也。文武孝德皇帝。與大蕃神聖贊普。締結之黎贊陛下。二聖舅甥。睿哲鴻被。

曉今永之屯。亭於憫之情。恩覆其無內外。商議叶同。務令萬姓安泰。所恩如一。成久遠大治之績。慈觀同心。以申隣好之義。共成厥美。今燕義二國所守。見管封疆。洸岷之東。屬大唐國界。其塞之西方。是大蕃境土。彼此不爲殺敵。不舉兵革。不相侵謀。封疆或有猜阻。挺生。問事。訖給以衣糧。放歸。令社稷山川無擾。各敬人神。然舅甥相安之義。不朽。每須通傳。彼此相倚。一任常相往來。兩路漢蕃。臣以將軍谷交馬。其洸岷之東。大唐祇應。清水縣之西。大蕃供應。舅甥親近之禮。使其兩界煙塵不揚。同聞頌德之名。須無驚恐之患。行人情備。鄉土俱安。如始斯樂業之垂恩萬代。則稱羨之聲。遍於日月所照矣。蕃於蕃國受安。漢亦漢國受榮。茲乃舍其大業耳。各依此盟誓。永不移易。當三寶及諸賢。並日月星辰之下。其陳刑具爲盟。設此大誓約。如有不依此

誓蕃漢背約破盟者。來其殃禍也。倘傾覆以及動陰謀者。不在破盟之限。蕃漢君臣並稽古立誓。周細爲文。二君之德。萬載稱揚之內。蒙庶人民咸頌矣。

西藏第一番王傳七世。至曲結松贊噶木布。

唐書作弄贊贊普

迎唐公主。又差頭人倫布噶爾迎巴勒布王鄂

特巴爾郭恰之女拜木薩爲妾。唐公主帶來釋迦牟尼佛像。拜木薩帶來墨居多爾濟佛。白木薩欲修廟宇。藏王擇地興修。唐公主卜算藏地形勢。乃妖女仰面之象。拉撒海子乃妖女心血。是爲海眼。須將海眼填塞。上修廟宇。如蓮花形。將四圍風脈更正。如八寶聯絡。乃得吉祥。藏王遂興工將海子四面用石堆砌。海眼中忽起五色霞光。現出石塔三層。用石拋擊。然後用木接蓋。空隙處鎔銅淋滿。海眼始平。藏王又虔祝神佛。欲將邪氣鎮壓。在昌諸銷囉。倫塔。堆陽四地方接連地脈之處。建寺一百八座。時有龍王現洋般式樣。用石堆砌。大昭始成。相傳至今。一千八百四十餘年。其地有拉撒。內坐東向西。樓高四層。上有金殿五座。闌干殿宇。皆係銅底溜金。宏敞壯麗。中殿供奉釋迦牟尼佛。乃唐公主自中國鑄請來者。左廊有唐公主。藏王松贊噶木布。巴勒布王女拜木薩之像。其內神佛萬計。中殿供奉萬歲御座。香花然蓋。四季長輝。樓頂東南隅。有拜拉穆殿。神靈顯赫。番敬畏之。內藏上古軍器。烏鎗長八九尺。至一丈者。與今之九子炮同。弓。韃箭袋亦甚長大。大殿內有明萬歷時太監楊英所立碑一座。前壁上繪唐元奘法師求經師弟四人像。門外有唐番和盟碑。高約一丈五尺。寬

約四尺厚約三尺兩旁刊有大臣太宰尙書等字跡並牛僧儒姓名碑側古柳二株老幹蟠屈若龍虬相傳植自唐時云。

小昭寺

大昭寺北半里許番名喇木契坐西向東樓高三層上有金殿一座亦頗壯麗乃唐公主所建因唐公主悲思中國故東向其門殿內佛像名墨珠多爾濟又有釋迦牟尼佛彌勒佛諸像或云塑像內有唐公主肉身座上書默寂能仁四字其南卽頗羅柰舊宅。

薩木秧寺

俗稱桑蒿寺

拉撒東二日山南薩木秧地方藏王曲結松贊噶木布第五世曲結赤松特贊欲修札瑪爾正桑廟赴甲噶爾延請班第達擇地興修未成復令藏地能習經咒之人赴甲噶爾請祖師白瑪薩木巴娃降收妖邪仿照甲噶爾阿蘭達蘇哩廟宇式修造三頂四面八方以象星宿後有噶瓦拜勒孜覺囉墨嘉木參等數千人教化大行修立十二處大寺俱安設喇嘛道士誦經相傳至今一千四十三年又舊字內載拉撒東南噶勒丹寺相近其樓閣經堂佛像與大小昭相似內供關聖帝君像傳云唐以前其方多鬼怪爲害人民不安帝君顯聖除之人始蕃息土民奉祀稱尊號曰革塞結波達賴喇嘛歲至其地講經。

多爾濟札古寺

附近薩木秧寺。在札洋宗山之巔。寺內有洞。高二千餘丈。梯木而上。洞內石蓮花佛座。座前石几。盒內有白土可食。味如糝粬。次日復生。其洞須然火而入。座後有一大海。云作惡之人至此。必失足墮海中。番人畏憚而不敢忽焉。

察木珠寺

俗名昌諾寺

藏王曲結松贊噶木布。修立大昭之時。赴雅爾噶等處。見一小海子。內有妖蛇五首。欲將海水屏乾。上建廟宇。遣覺拉化爲鵬。斬之。海水盡赤。水遂消。乃於其地修建廟宇。供奉桑堆佛十九尊。即陰陽佛也

其一尊乃不上自成之像。上建五塔以鎮之。又塑佛母伊興科爾洛像、羅金褚旺像、蒼巴洞托爾足像。即拉穆吹忠護法。又修極樂寺、彌勒寺。相傳至今一百四十餘年。

色拉寺

唐古忒語。色金也。拉山也。其山出金。故名。

拉撒北十里。色拉山。宗喀巴在色拉曲頂居住之時。觀其地可建廟宇。其弟子甲木慶曲結沙克伽伊喜。明時入中國爲禪師。賜物甚盛。回藏後。宗喀巴令其在色拉建立大寺。所供佛像。係由內地帶

檀香雕刻釋迦佛、十八羅漢、及諸佛像。又修上下札倉、札倉譯言僧房也。嘉庚、贊仲、鍾頂小寺四所。招喇嘛居

住。其寺依山勢建。金殿三座。層樓高聳。達賴喇嘛亦歲至講經。寺中供一降魔鐵杵。長不足二尺。頭如三稜鏑。一頭如人頭狀。番語呼爲多爾濟。相傳建寺時。自大西天飛來。其寺堪布珍之。番人必歲一朝供。

布賴蚌寺

俗名別蚌寺

拉撒西二十里。前臨大道。後依山巖。宗喀巴之弟子札木陽曲結札什巴爾丹。在聶烏地方居住之時。夢神人語此地宜修寺院。賜予五千徒衆。並現出無量水泉數處。覺而告其師宗喀巴。乃令修寺。其時卽有聶烏富民那木喀桑布出資布施。修建廟宇。又旺固爾山起出海螺。賜與弟子札木陽曲吉札石巴勒丹。殿宇修像甚盛。其修郭莽、洛賽嶺、結巴、沙谷爾、獨瓦、得洋、阿克巴等七處札倉。乃蒙古西番各土司布爾卡木布等處。凡初出世之呼畢勒罕。及遠近大小喇嘛初學經者。多聚處於此。地有園亭一座。爲達賴喇嘛避暑處。去寺里許。有吹忠殿。乃無妻室者與他處異。

噶勒丹寺

俗名甘丹寺

拉撒東五十里。噶勒丹山。宗喀巴先在大昭率衆喇嘛。攢昭誦經。然燈。衆喇嘛求立寺院。宗喀巴乃

手舉金剛菩薩云。宜在旺固爾山創建。遂造大經堂。內塑桑堆即德木楚克、即安樂佛多爾影佛像。又修

沙爾孜、江孜二處札倉。以供衆喇嘛棲止。相傳至今有三百八十餘年。其形勢與布達拉略同。其經樓、佛像、幢幡、寶蓋、華麗與大小昭相似。乃宗喀巴坐牀之所。示寂於噶勒丹寺。彌勒佛前。爲黃教發源之地。有黃教堪布喇嘛主之。

木鹿寺

大昭之北。小昭之東。樓高四層。亦頗壯麗。經堂佛像。亦甚整齊。爲西番僧人習經之所。西有經園。刊布三乘經文。頒行各處。

菊噶木寺

俗名菊岡寺

毗連經園。樓高三層。爲蒙古僧人學經之所。

噶瑪霞寺

卽垂仲殿。大昭東半里許。寺內塑神像。猙獰惡煞。內居護法。乃喇嘛裝束。仍娶妻生子。世傳其術。卽中華之巫類也。每月初二、十六日下神。頭戴金盃。上插雞羽。高約二三尺。穿甲。背插小旗五面。週身以白哈達結束。足穿虎皮靴。手執弓刀。登坐法壇。凡人叩問吉凶。託神言判斷禍福。出則人從裝束。

鬼怪執旗鳴鼓鉞導引之。寺內皆有吹忠。亦有女人為之者。為番人所敬信焉。

達隆寺

拉撒北過鍋噶拉山一日。寺亦宏麗。喇嘛約千餘。

呼正寺

俗名熱正寺

拉撒東北二日。角子拉上。寺內喇嘛衆多。山徑曲折。鳥獸寂無。如觀之。喇嘛振鐸。俄頃山禽獐鹿諸類畢集。寺有呼正呼圖克圖掌之。

楚布寺

業朗寺

拉撒北七十里之浪子地方。各有呼圖克圖掌之。紅帽教之宗名噶嗎巴。黑帽教之宗名沙嗎納。明萬歷時入覲。勅賜封號印冊。今襲衣鉢者。一名札哇楞布齊。一名革桑楞布齊。

鄂納廟

在拉撒東北

薩木他廟

在拉撒東南

噶爾韃廟

在拉撒西北。與沙羽克阿拉山相近。

觀音寺

業

碩哩寺

曲水鏡

班古爾曲底寺

江

岡堅喇嘛寺

距札什倫布

協噶爾喇嘛

協噶爾

第哩浪古寺

定

俄拉寺

由轟拉木赴宗喀一站

達朔寺

整木

木宗寺

甲木真寺

距濟噶

帕巴寺

濟

羣喀寺

宗

阿拉寺

喀

工龍寺

日

聖宗喀 三站 拉丫爾寺 邊 崙布寺 薩迦寺 江公寺 通羅 岡堅寺 生多喇嘛寺 距札什倫布 鹿古寺 距札什倫布

甘勒丹 密交 達拉克寺 昔 波多寺 拉 陽八井喇嘛寺 即沙瑪爾巴舊居今改給濟 曲桑寺 楚普寺 浪 箭頭

寺 在布賴率 寺之下

關帝廟

舊建在札什城之南。欽差駐藏工部尚書和琳重葺廟宇。撰碑文。其辭曰：恭惟我國家撫有區夏。東至朝鮮。西窮大漠。南極于交趾。北抵于庫倫。暨海外西洋諸國。罔不輸職貢。奉正朔。幅幘之廣。千古罕有。舉凡王師所向。靡不誠服。關聖帝君實默佑焉。唐古忒在勝朝。為烏斯藏。自聖祖仁皇帝時。歸入版圖。駐兵札什城。舊建有帝君廟。靈應異常。僧俗無不敬禮。乾隆辛亥秋。廓爾喀部落惑於逆僧。沙瑪爾巴遊說。潛師侵掠。後藏賊衆我寡。憑高固守。賊屯林中。每夜數驚。自相蹂躪。以為大兵且至。懼而引去。皇帝赫斯震怒。命大學士忠銳嘉勇公福康安為大將軍。超勇公海蘭察。四川總督惠齡為參贊大臣。統領索倫漢土官兵。聲罪致討。副都統賽尙阿。巴圖魯成德分率偏師。由聶拉木牽綴賊勢。琳同大學士毅籌畫軍儲。往來策應。大將軍等由濟隴進烏道羊腸。賊人負嵎據險。我兵出奇。

奮勇七戰七捷。直逼賊巢。廓曾舉國懼怖。哀懇乞降。我皇上如天之仁。不忍覆其巢穴。詔許歸誠。自進師至凱旋。凡三越月。固由聖主廟謨廣運。指示機先。大將軍運籌帷幄。靡堅不破。然究屬帝君威靈呵護之所致也。大將軍回藏。度地磨盤山。勅立神祠。以答靈貺。僉議札什城舊廟爲春秋禋祀之所。廢而不葺。良用缺然。爰是琳與制府惠齡捐資庀材。諏吉鳩工。命同知李經文董其役。卑者崇之。隘者拓之。有廡有堂。有嚴有翼。閱月而竣。事神之憑依。於是乎在。蓋國家聲教之所及。無非神威之所訖。自非真氣盤礴。塞乎天地之間。輔翊景運。安能彌綸中外。靈威異彰若此乎。不敏職司邊寄。凡所以整飭戎行。挽回風俗。敢不忱惕惟厲。上報主知。於展謁之次。敬進官吏而勵之曰。帝君有云。心在人中。如日在天上。吾等益當激昂自奮矣。是爲記。

又。
關帝廟

新建於磨盤山頂。乾隆五十七年十月。大學士忠銳嘉勇公福康安撰碑文。其辭曰。乾隆五十有六年秋。廓爾喀自作不靖。侵陵藏界。並搶掠札什倫布廟。皇上赫然震怒。謂衛藏自策零敦多卜殄滅後。隸職方者百餘年。使斬徵調之煩。從移駐班禪。達賴之議。其濟甯、聶拉木等地勢。將盡委之賊。此後受戕者。當不止前後衛藏矣。特賁繪音。福康安爲大將軍。一等公海蘭察。四川總督。惠齡爲參贊。

大臣統領勁兵。大張撻伐。大司空和琳飛芻輓粟。專司策應。爲後路聲援。大學士孫士毅復自昌都馳赴西招。協理軍儲。於五十七年夏。由宗喀濟甯整旅邁進。先是駐軍前藏。徵兵籌餉。謁札什城關帝廟。見其堂皇湫隘。不可以瞻禮。緬神禦災捍患。所以佑我朝者。屢著其孚格。于是度地磨盤山。鳩工庀材。命所司董其役。默禱啓行。洊臨賊境。七戰皆捷。距陽布數十里。廓會震響軍威。乞降至再。皇帝鑒其誠款。體上帝好生之德。准納表貢。詔令班師。並御製十全記。頒示臣下。予惟此視師。自進兵以來。山谿險劣。瘴霧毒淫。竟獲履險如坦。不三月而蕨縉。自非神祐不至此。凱旋之日。廟適落成。與諸公瞻仰殿廡。徘徊俎豆。深感大功速竣。維神之力。而益欣繼自今。前後衛藏之永永無虞也。是爲記。

衛藏永安寺

乾隆六十年。御賜廟名曰衛藏永安。頒四譯字扁額。建在磨盤山之南麓。參贊公海蘭察巴圖魯等捐資修建。爲濟甯呼圖克圖住錫之所。乾隆五十九年。工竣。欽差駐藏內閣學士兼禮部侍郎和甯撰碑文。其辭曰。文殊皇帝。真天人師。大千普育。法輪護持。阿耨波淨。耆闍雲垂。憬彼廓番。蝸觸坤維。皇帝震怒。乃命麾戈。大將軍福。大司空和。軍籌戰律。秉算靡訛。巴圖魯海。霹靂摧阿。克震克捷。壬子之秋。元戎奏績。虎將陳猷。爰發願力。仰答神庥。布金五千。作廟山陬。載謀載度。濟甯浮屠。鳩工閱歲。

藏厥宏謨。翼翼輝輝。寶像金軀。于萬斯年。永祝皇圖。

雙忠祠

在寵崗。爲傅拉二公建。乾隆十五年。朱爾墨特那木札勒謀逆。二公計誅之。爲其黨所害。乾隆五十八年。大將軍公福康安征勦廓爾喀班師回藏。爲之撰文勒石。其辭曰。雙忠祠在前藏大昭東北。向爲駐藏大臣行署。朱爾墨特那木札爾之難。駐藏大臣傅公拉公死焉。署亦燬於火。番民感二公之忠烈。因其舊址。請立祠肖像以祀。蓋以二公大有造於衛藏也。傅公諱清。爲康安世父。乾隆十五年。公以都統奉命駐藏。左都御史拉布敦副之。時朱爾墨特那木札爾襲其父頗羅鼐郡王封。專藏事。多不法。公裁抑之。橫如故。公廉其叛逆有跡。密疏請便宜從事。以絕後患。奏入。上以公孤懸絕域。未可輕舉。命都統班第代拉公將明正其罪。以申國法。旨未至。反謀益亟。廣布私人。凡駐藏大臣一舉動。輒偵邏之。禁郵遞不得通。潛結準噶爾爲外援。藏中有異已者。將盡誅之。勢且延及達賴喇嘛。爲雄長一方之計。公如坐待其變。事發而公必死。誘而誅之。其羽翼已成。衆寡不敵。而公亦死。均之死也。毋寧變速而禍小。遂與拉公定密計。以十月十三日。告其黨羅卜藏達什曰。召藏王來。有旨令議事。朱爾墨特那木札爾以公勢孤。聞召不之疑。亦不設備。公與拉公登樓待之。止其衆於樓下。隨上者四五人。公見之。顏色不動如平時。引入臥室。闔戶。急掣佩刀砍之。中項而仆。從者競前以梃擊其

首立斃。羅卜藏達什在室門外。聞格鬪聲。知禍發。扶臆跳越。告其壻第巴喇布坦等。號召賊衆。須臾。屬至。鎗礮競發。環攻之。牆高而固。不能入。賊乃積薪樓下。烈燄四起。樓焚。賊遂攀援而登。公手刃數賊。身被三傷。力竭。自刎以殉。拉公亦中創死。吁。烈矣哉。夫衛藏距京師萬有餘里。公鎮其地。戍兵寡弱。外不足以制其力。內不足以奪其權。設朱爾墨特那木札爾竟舉兵反。番民性怯懦。勢必舉而從之。以向隸版籍之地。一旦陷賊。即使以身殉。事已無及。勞師糜餉。致貽聖主西顧憂。疇職是土。顧可。以一死委其責耶。公獨奮不顧身。毅然定大計。乘其未發。誘而誅之。餘黨雖擾攘。而渠魁旣殲。如瓦解冰泮。無能爲難。不旋踵而就縛。盡伏厥辜。公雖死。而全藏以安。國威以振。是非霍光之誘斬樓蘭。所可同日語也。事定。班公及四川總督公策楞至藏。列二公死事狀上聞。天子震悼。下詔褒嘉忠烈。公與拉公贈一等伯。入賢良祠昭忠祠。公仍入家祠從祀。子孫以一等子爵世襲罔替。卹忠錄。庸延及苗裔。嗚呼。公之心。其可慰矣。康安以五十七年奉命督師進勦廓爾喀來藏。謁雙忠祠。瞻拜遺像。距公殉節時。蓋四十餘年矣。藏番追念兩公遺澤。歲時奔走。香火不絕。至今猶有能道當時遺事者。惟碑碣缺如。堂廡垣牖。閒有傾圮。爰於班師之日。葺而新之。且恐歲久遺跡或湮。敬書其事。以示後人。其時同殉者爲主事策塔爾。參將黃元龍。並爲位於廡以配食。傳曰。飽捍大患則祀之。如公者。番之民雖百世祀可也。

拉里大寺

拉撒東行一千十里名拉里山。由山右盤旋而上。山腰有大寺一座。管地方之堪布喇嘛居之。

丹達廟

拉里東行四百八十五里。有雪山名沙貢拉。山之東麓有丹達神廟。最稱靈驗。凡過者必虔誠禱祝。乃得平安。相傳雲南某參軍解餉過閭王碛。餉鞘落雪窖中。身與之俱墜。人無知者。迨春夏雪消。猶僵坐鞘上。土人驚異。遂奉其尸而祀焉。乾隆五十八年四月初九日。奉上諭。福康安奏。此次官兵赴藏。經過丹達山。均無阻滯。山靈助順。請加封號。並頒扁額。丹達山遠在徼外。最爲險峻。風雪不時。自軍興以來。官員兵丁調遣至藏。以及事竣凱旋。均當冬令。經過該處。得以安穩。進行。豪無阻滯。實爲神麻佑助。靈應聿昭。宜列在祀典。錫之封號。著封爲昭靈助順山神。該部載入祀典。春秋致祭。並頒去御書扁額。交駐藏大臣。於山下舊建神祠。敬謹懸掛。以答麻應。而示懷柔。該部知道。欽此。御書扁額。教闡遐柔四字。乾隆五十九年。戶部議覆。祭丹達山神。每年春秋二季。共需祭品銀二十一兩。按年先於察木多庫貯臺費銀內墊支備辦。入於鹽茶耗羨項下開銷。咨部立案。乾隆五十七年。欽差戶部尙書和琳懸掛扁額。鎮靖利濟四字。乾隆五十八年。大將軍。大學士。忠銳嘉勇公。福康安懸掛扁額。四字。乾隆五十九年。欽差內閣學士。兼禮部侍郎。和甯懸掛神贊。其贊曰。驂臨騁景。

鳳凰高飛。蹇蹇匪躬之子安歸。節彼丹達。神其憑依。在昔縣賁。洛馬知冤。傷哉雪嶠。羈掛游魂。藏舟千古。齊壽崑崙。石沉星隕。天鑒純忱。忠信篤敬。靈感斯深。典守發省。履道驚心。巍巍示象。馨香既升。得大自在。超最上乘。願施勿畏。勿墜神燈。乾隆五十九年。欽差工部尚書松筠懸掛扁額峙帖通衢四字。

碩板多、廟一座。

丹達東行三百一十里。至碩板多大寺。築土甃石爲城。枕山臨河。內供佛像。其經堂喇嘛第巴居之。

喇貢、廟五座。

碩板多東行四百七十里。名喇貢大山。有金剛寺、空沙寺、吉祥庵、大佛寺、雲臨寺。

裏角、廟三座。

喇貢東行一百八十里。名裏角塘。有長鳴寺、永定寺、白衣庵。

俄羅橋、廟五座。

裏角東行五十五里。名俄羅橋。乃察木多帕克巴拉呼圖克圖坐靜花園。有萬壽寺、雲頂寺、大

牟寺、定海寺。

察木多。舊名昌都。亦名喀木。即所謂康也。

俄羅橋東行四十里。名察木多。有江巴林寺。亦名戎空寺。北係山麓。層樓金殿。左右兩河環繞。頗極壯麗。乃帕克巴拉呼圖克圖坐牀之所。又有二呼圖克圖。三呼圖克圖。商卓特巴。率三千喇嘛居之。戎空寺左有大寺。內供奉萬壽無疆御座。令節朔望朝賀。又有普安堂。乃漢人所建講經堂。

龍王廟

包墩

察木多東行一百五十里。包墩。有善化寺。科兒寺。林光寺。

巴貢

包墩東行一百里。名巴貢。有觀音閣。自察木多至於子。多建漢人寺。

乍了

包墩東行三百三十五里。名乍了。有大寺。坐西北。向東南。土城圍繞。有呼圖克圖掌之。其地方事務。俱聽該喇嘛。商卓特巴管理。又有轉經閣。在大寺前。男女定婚嫁俱於此。

巴塘

乍了東行六百二十里。至南墩。出西藏界。入巴塘界。又東行三百里。至巴塘。有大寺。坐東向西。垣周百餘丈。掌教堪布喇嘛居之。其餘喇嘛築土平房環繞而居。無口糧寺院八十四座。有口糧寺院五

十七座。唯南墩漢人寺。每年七月。巴塘。察木多兩處客民。皆雲集於此。貿易貨物。如內地廟會。

裏塘

巴塘東行五百四十五里。名裏塘。有長吉春科兒寺。大堪布喇嘛居之。管喇嘛三千餘名。又關帝廟。

乃漢人所建。又貯經堂。金剛寺。尼姑庵。均在裏塘工沙寺。在車納空沙寺。在俄洛納土寺。麻唐寺。均在喇桑登寺。在喇

爾布那勒吉策巴寺。在上車納登沙寺。在下車納工鳴牟寺。在工鳴陽頂寺。巴木補寺。均在烏巴薩木配林寺。在鄉城立禪寺。

在喇嘛了申角寺。在中壩

打箭爐

關帝廟。武侯祠。漢人寺。均在壩東郭將軍廟。獨漢時人名達。諸葛武侯曾令造箭於此。報國寺。又名喇嘛寺。在壩西惠遠

寺。在壩城西北雍正七年。奉勅建。並賜名。其地一名噶遠城。達賴喇嘛曾移居於此。至今由西藏派大堪

布喇嘛往掌之。雍正九年。御製惠遠廟碑文。敬編卷首。

高日寺

打箭鑪西行一百九十里。名東俄洛。過大雪山。三十里至高日寺。乃紅帽堪布所居之寺。

札什倫布寺

拉撒西南去八日。卽後藏。寺名札什倫布。乃宗喀巴之大弟子根報敦珠巴所建。即頭鑪達其寺背山

臨河。殿宇宏敞。佛像莊嚴。亦甚壯麗。乃班禪喇嘛坐牀之所。凡學經成者。必至此受戒。

薩迦寺

後藏札什倫布境內。有薩迦呼圖克圖。乃元時帕思巴之後。爲紅帽教之宗。經簿載育仁菩薩之後。人昆貢確嘉卜通達經典。看得奔布山風脈佳勝。欲創建廟宇。向業主降雄固喇娃班第仲喜納密。酌克敦三人。欲乞售茲地。伊三人乃施舍不取價值。遂建此廟。供諸佛像。招僧住持。相傳至今七百二十餘年。其紅教喇嘛年少時。娶妻生子。至生子後。不復再近室家。始登法座。按輩相傳。

多爾濟帕姆宮

拉撒西行半月。羊卓白地方。海中有山。山巔建寺。極宏麗。有瀛洲蓬島之勝。寺內乃女呼圖克圖多爾濟帕姆所居。云北斗之精化生。昔第巴薩木結亂藏時。化猪遯去。藏地呼猪曰帕。故名。

娘娘廟

在札什倫布東北

淋噶爾廟、阿克巴札桑廟、推薩木諾爾布淋廟、挾爾孜廟、濟康廟、俱

在

札什
倫布

關帝廟 在札什倫布
營官寨前

乾隆五十八年。欽差工部尚書和琳撰碑文曰。札什倫布爲歷代班禪喇嘛焚修之所。旁有小山。巫聳峙。爲營官寨。自入版圖以後。卽其地建帝君廟。歷昭靈應。漢番僧俗奉祀惟謹。乾隆五十六年秋。廓爾喀惑於逆僧沙瑪爾巴邪說。覬覦札什倫布財物。潛兵掩至。番民僧俗迫於變起倉猝。皆鳥獸散。都司徐南鵬僅率綠營弁兵七八十人。據營官寨以當其衝。賊兵環之數日。斷汲水道。仰攻八晝夜。我兵固志死守。閒發矢石。無不奇中。掘地十餘丈。飛泉湧出。歡聲動地。士氣百倍。賊隨稍卻。屯聚柳林中。以爲久計。忽夜驚自相戕殺。懼而引去。行至通拉山。風雪驟作。賊衆僵斃。不可勝計。咸以爲帝君靈應所致。明年七月。大將軍、大學士、忠銳嘉勇公福康安奉命撻伐。七戰七捷。距陽布不數舍。賊酋舉國震懾。遣其大頭目詣軍營輸納表貢。願奉約束。永爲不侵不叛之臣。哀懇再四。大將軍具狀以聞。詔釋弗誅。九月。班師。大功告蒞。蓋惟聖主統馭四夷。無思不服。亦惟帝君神功赫奕。歷相我國家。師行數萬里外。奏凱若斯之速也。琳奉命總督糧餉。往來策應。凱旋後。旣修札什城舊祠。以誌靈貺。緬維後藏爲神蹟昭著之所。堂皇湫隘。竊用惡馬爰命所司董其役。鳩工庀材。計費千餘緡。向

之因陋就簡者均已肅然改觀落成日謹敘顛末而爲之記從而銘曰惟神配天惟皇建極佐我國家是憑是式威靈顯昭不可思憶禘祀蒸嘗報功崇德垣墉旣新丹雘旣飾殿宇耽耽門廡翼翼於萬斯年獲此西域

御前侍衛正藍旗滿洲副都統和隆武巴圖魯領隊大臣額勒登保

乾清門侍衛正黃旗蒙古副都統布隆巴圖魯領隊大臣岱森保

乾清門侍衛副都統職銜西里巴圖魯領隊大臣珠爾杭阿

乾清門二等侍衛伊昌阿巴圖魯承德

多托禮巴圖魯阿尼雅布

哈西巴巴圖魯安祿

雜勒丹巴巴圖魯桑吉斯塔爾

通政使司副使加三品卿銜軍機處行走方維甸

理藩院柔遠清吏司員外郎軍機處行走長齡

戶部堂主事兼貴州陝西清吏司候補員外郎軍機處行走巴哈布

內閣侍讀軍機處行走楊揆

鑲黃旗蒙古副都統、法福禮巴圖魯、領隊大臣烏什哈達。

鑲藍旗蒙古副都統、西郎阿巴圖魯、領隊大臣德楞泰。

頭等侍衛、索倫總管、加副都統職銜、能登額巴圖魯、領隊阿木勒塔。

頭等侍衛、加副都統職銜、額騰額巴圖魯、果爾海。

頭等侍衛、努塔巴圖魯、五紹。

楊桑阿巴圖魯、顏太。

頭等侍衛、蒙興保。

二等侍衛、德吉巴圖魯、納丹保。

額爾克巴圖魯、薩甯阿。

錫特洪巴圖魯、阿哈保。

呼東阿巴圖魯、定西甯。

額騰伊巴圖魯、克興額。

二等侍衛、德勒琿、阿納保。

德勒克依、阿吉。

烏勒呼訥。 色玉慎。

德全。 籌保。

巴哈。 博依保。

三等侍衛、綳僧額巴圖魯吹札布。

喀勒崇伊巴圖魯達爾精阿。

託莫爾渾巴圖魯多隆武。

碩隆武巴圖魯捫撒木保。

色莫爾亨巴圖魯綸布春。

三等侍衛傅昇。 穆克登布。

噶爾第。 溫保。

諾託保。 富罕。

額勒金泰。 定札。

富永。 巴蘭。

莫爾渾保。 富蘭。

化品。

克色保。

札保。

溫春。

阿達。

烏勒哈爾。

三布爾。

藍翎侍衛折克。

雙福。

亨昆。

巴顏察。

諾穆起。

明喜。

噶拉。

寶班。

綽倫保。

莫新。

鄂爾哲依。

賓德爾。

色克通阿。

格勒登徹。

富僧德。

德繼特。

江鼎。

花山保。

烏福納。

舒靈阿。

甘肅永固協副將烏爾固勒濟巴圖魯達音泰。

四川懋功協副將世襲一等子王承勳。

維州協副將五十一。

甘肅甯夏府知府隆興。

四川雅州府知府姚令儀。

甯遠府知府李憲宜。

前任龍安府知府重光。

甘肅甘州城守營參將劉懷仁。

四川漳臘營參將呂玫。

越嶲營參將徐南鵬。

陝甘督標前營遊擊楊宗澤。

陝西鞏昌營遊擊雷仁。

四川督標左營遊擊長春。

提標左營遊擊王錫章。

提標右營遊擊蒲益章。

峨邊營遊擊李芝榮。

綏靖營遊擊胡尙賢。

崇化營遊擊額爾亨額。

川北鎮標中營遊擊烏爾公阿。

左營遊擊王威甯。

楞格。

富體。

前鋒章京、哈布齊顯巴圖魯七十五。

護軍參領、覺多觀巴圖魯額勒金保。

葉布懇額巴圖魯彥吉保。

吉勒彰阿。

副護軍參領常善。

前鋒侍衛察靈阿。

委護軍參領德通。

雅爾哈善。

前鋒校索多巴。

特依順保。

武章阿。

親軍校哲爾金保。和成額。台斐音阿。

護軍校噶塔爾。音德。墨爾根額。

體布克蘇。巴桑。

甘肅布政使司布政使景安。

四川按察使司按察使林儁。

松茂兵備道倭什布。

前任福建延建邵道、四川候補道承勳。

四川川北鎮總兵官朱射斗。

重慶鎮總兵官、堅勇巴圖魯袁國璜。

松潘鎮總兵官諸神保。

建昌鎮總兵官、奮圖里巴圖魯穆克登阿。

川北鎮總兵官彭承堯。

松潘鎮標中營遊擊張志林。

建昌鎮標中營遊擊什格。

左營遊擊谷廷棟

會鹽營遊擊德勝保

靖遠營遊擊七格

直隸石柱廳同知湯健業

順慶府同知范栩

候補同知李經文

雷坡通判蔡廷保

順慶府通判蔡廷弼

候補通判楊開泰

綿州直隸州知州施鑑

忠州直隸州知州吉興

巴州知州常發祥

合州知州劉印全

湖北宜昌府興山縣知縣鄭人慶

四川成都府成都縣知縣周明德。

雙流縣知縣鍾逢太。

灌縣知縣徐鼎。

保甯府通江縣知縣鍾蟠雲。

重慶府巴縣知縣吳桂。

瀘州合江縣知縣張天爵。

潼川府中江縣知縣毛大瀛。

樂至縣知縣魏守曾。

嘉定府峨嵋縣知縣王贊武。

夾江縣知縣谷暄。

綿州安縣知縣黃爲琳。

重慶府綦江縣知縣常天佑。

原任資州資陽縣知縣張熙廣。

資州井研縣知縣湛夢蛟。

夔州府奉節縣知縣沈達。

原任達州東鄉縣知縣蔣曾煌。

候補知縣張椿。

馬敦詩。

監修同知李經文。

把總趙國泰。

單大雄。

右銜名。原書載在詩文類查西藏公爵台吉各勅覆呈之後。今詩文類已刪。再三展讀。因悟末幅監修同知李經文一人。曾見於前札什城關帝廟碑。云命同知李經文董其役。董役。卽監修也。是此銜名可定爲札什城關帝廟碑陰人名無疑。然不敢徑入。今附在寺廟門之後。

衛藏通志卷七

番目

謹案衛藏番目向例惟辦事之噶布倫暨管兵之戴琿等係由駐藏大臣擬定正陪請旨補放其餘管轄地方之營官職掌事務之第巴等俱聽商上自行揀用自乾隆五十七年議定章程並賞給頂帶分隸職司俱由駐藏大臣主持陞調其品級考銓選法實與內地官階無異謹查明編纂以昭遵守

乾隆五十七年十一月大學士公福康安大學士孫士毅工部尙書和琳四川總督惠齡等具奏籌議衛藏章程內開一藏內大小番目缺出應行定立等級統歸駐藏大臣會同達賴喇嘛揀放也查噶布倫戴琿等向雖由駐藏大臣具奏其餘商上仔琿商卓特巴業爾倉巴協爾幫希約第巴朗仔轄密本第巴噶廈中譯小中譯卓尼爾各察落大小營官係噶布倫等酌擬數人由達賴喇嘛挑定駐藏大臣並不過問大缺營官尙由達賴喇嘛與駐藏大臣發給執照小缺營官並無駐藏大臣給照之例是以向來大小番目遷轉補放毫無等級卽如商卓特巴營官等缺出或於布達拉商上噶

廈公所當差之人挑補。或以並未當差之人。閒散人等放補。至噶布倫之缺。本應以戴琫陞補。或有徑由大族子弟補放者。戴琫之缺。本應以營官陞補。亦有以戴琫年齒幼小之子弟補放者。雜亂參差不成體制。甚或營求賄囑。其弊無窮。查噶布倫等辦理一切事務。戴琫管理番兵。商上仔琫。商卓特巴。係總司出納。以上各缺。尤關緊要。不可越次補放。啓躡等倖進之弊。卽大缺邊缺營官。管理地方番民事務較繁。亦不應以未經歷練之人充補。今請核定品級層次。遇有噶布倫缺出。於戴琫及商卓特巴。仔琫內擇其才具優長者。著有勞績者。駐藏大臣會同達賴喇嘛揀選二員。擬定正陪。奏請補用。戴琫缺出。先儘新設管領番兵之如琫內揀選。如一時不得其人。再以邊缺營官內揀選。亦會同達賴喇嘛。擬定正陪二員。具奏請補。候旨遵行。不得仍前舊習。率用本不管兵之番目。致誤操防。商上仔琫。商卓特巴缺出。以管放衆番目口糧之業爾倉巴。管理刑名之協爾幫。噶廈辦事之大中譯。及濟仲喇嘛陞補。其業爾倉巴。協爾幫缺出。以管理布達拉一帶番民希約第巴。管理拉撒番民之朗仔轄密本。管達賴喇嘛馬廠之達本陞補。其希約第巴。密本缺出。以大缺邊缺營官調補。及噶廈卓尼爾陞補。查業爾倉。希約第巴兩項內有喇嘛者。亦准挑選喇嘛補用。大中譯缺出。以小中譯。噶廈卓尼爾陞補。大缺營官缺出。以小缺營官調補。及小中譯補放。其管兵甲琫。亦准調補。邊缺官。惟小缺各營官。始准於東科爾及喇嘛內揀選補用。所有營官缺分。應行詳悉查明大缺。邊缺。小

缺。寫立冊檔存案。以便遵守。其喇嘛補放營官者。多係達賴喇嘛隨侍之人。因其勤勞年久。不能遠離左右。酌量派管地方。藉資養贍。雖難一槩禁絕。然亦須由駐藏大臣另派妥幹之員前往。該喇嘛營官不得私行派人前往。致滋弊端。噶廈小中譯。卓尼爾雖係小番目。隨同噶布倫辦理事務。亦關緊要。應揀選東科爾心地明敏者挑補。以上各缺。均由駐藏大臣會同達賴喇嘛挑選。如達賴喇嘛徇私不公。准駐藏大臣駁正。秉公揀補。除噶布倫。戴琿奏明補用外。其餘若一。請旨。不免煩瑣。應請由駐藏大臣會同達賴喇嘛。給發清漢字番字印照爲據。所有噶布倫。戴琿以下管事各頭目。管地方各營官。均係按等補放。已足杜絕弊端。此外如管門。管草。管糶。管帳房。管牛羊廠頭人等缺。均無關緊要。應聽達賴喇嘛自行揀補。至札什倫布管事者。皆係喇嘛。向來陸續調轉。亦無等級。嗣後商卓特巴缺出。以歲琿喇嘛。森本喇嘛陸續補。歲琿缺出。以濟仲喇嘛陸續補。森本缺出。以傳事卓尼爾陸續補。不准越次補放。至札什倫布所屬寨落較少。並無邊界要緊之缺。俱仍照向例挑補。所有後藏之商卓特巴。歲琿。森本各大缺。及管地方營官。均照前藏之例。由駐藏大臣會同班禪額爾德尼補放給照。其餘各缺。不過管茶葉柴草等事。極爲瑣屑。俱非緊要。應聽班禪額爾德尼自行補放。如此明定等差。秉公拔補。以次陸續。庶大小番目皆能得人。營求賄囑之弊。自可不杜自絕。

十二月。又具奏。邊界營官。向俱用庸劣營官充補。是以辦理均未妥協。嗣後應揀選妥幹之員補放。

並應照內地邊俸之例。酌定年限。陞擢以示鼓勵也。查邊界地方。與外番接壤。約束番民。稽查出入。最關緊要。必須精明強幹之員。方足勝任。向來稍能辦事營官。因邊界氣惡劣。冰雪較早。皆願在前。藏當差。憚於遠涉。將冗關無能者。濫行派往。以致辦理諸事。每多弊竇。嗣後補放邊缺營官。於小缺營官。及管兵之甲。臻番目內。擇其幹練者。調補。如果到任三年。辦理妥善。駕馭得宜。卽行更換。調回。記名以戴琫等缺。陞用。倘有辦理不善之處。立卽革退。不可稍事姑容。如此懲勸有方。番目皆知奮勉。亦永資綏靖矣。一、嚴禁襲充番目之弊。以勵人材也。查西藏世家子弟。稱爲東科爾。凡遇挑取大。小番目。必於東科爾中。通書算者。補放。其餘番民中。卽有妥幹之人。並無進身之路。間或拔補定。臻小頭目。亦不能再有陞轉。雖番民積習相沿。悉皆推重世家。各安本分。尙無缺望。而若輩以門第相高。彼此接引。躡等超遷。勢將無所底止。臣等查核東科爾子弟。不下數千人。勢難一時更張舊制。轉致人心未協。前已酌定章程。如充當兵丁之番民。果能奮勇出力。技藝嫻熟。卽非東科爾出身。亦准由定。臻游擢至戴琫。其餘辦事之番目等。仍於東科爾內。揀其端謹歷練之人。按等補用。但不准襲充伊祖父職分。以致冒濫過甚。卽按取小中譯。卓克爾。小缺營官等番目。亦須年至十八歲以上。方准當差。不得以幼小之人。應名充數。致滋冒濫。

衛藏通志卷八

兵制 原目作番兵

謹案。唐古忒番兵。向來分派各寨農民。有事則調集爲伍。旣無統率。又少操嫻。雖有數萬之名。僅爲虛設。自乾隆五十七年定議額設差操。與註防綠營兵丁一體訓練。洵足爲衛藏保障也。謹照原議編纂。以重巡防。

乾隆五十七年十一月。大學士公福康安等會奏。爲酌定唐古忒番兵訓練事宜。縷陳條例。恭請聖訓事。一。唐古忒兵丁分設前後藏地方。應酌定數目。以肅兵制也。查唐古忒番兵原設有五千一百六十五名之數。其實兵民不分。係按各寨番民。定以派兵數目。並非額設番兵可比。戴琫平日無兵可管。遇事調遣。祇在各寨抽派。與派烏拉人夫無異。充數應名。多不使用軍器。以猝然調集之番民。責令打仗禦賊。無怪其毫無紀律。怯懦不堪。今請額定數目。於前後藏各設番兵一千名。此外衝途要隘之定日。江孜地方。安設番兵各五百名。共額設三千名實兵。此項番兵。即在安設地方。就近挑補。以省調戍之繁。前藏原設戴琫二人。卽令各管新設兵五百名。後藏原設戴琫三人。以二人駐劄。

後藏以一人分駐定日。均各管該處新設兵五百名。再添戴琫一名。分駐江孜。亦管新設兵五百名。各處俱有原設新設之駐防將備弁兵。卽令督率管束。教演技藝。前藏番兵歸遊擊統轄。後藏及江孜定日番兵歸後藏都司統轄。所有挑補番兵。造具花名清冊。交該管遊擊都司及戴琫稽查。外仍另繕名冊二本。一呈駐藏大臣衙門。一交噶廈公所。遇有事故。核實挑補。隨時呈報。以資考察。一、核定管兵番目。以專責成也。查藏內管兵番目。不但戴琫一員。徒爲虛設。卽戴琫以下之如琫、甲琫、定琫等頭目。亦祇空有其名。無裨實用。每遇出兵。另派第巴數人管領。其頭目兵丁。彼此各不相識。安望其協力齊心。奮勇出力。今於原設戴琫五名外。添設戴琫一名。自應仍照舊制。設立大小番目。逐層管束。於戴琫之下。設立如琫十二名。每名管兵二百五十名。如琫之下。設立甲琫二十四名。每名管兵一百二十五名。甲琫之下。設立定琫一百二十名。每名管兵二十五名。與綠營兵目相似。以上大小番目。俱由駐藏大臣會同達賴喇嘛揀選。年力精壯之人充補。發給委牌。倘敢虛應故事。廢弛軍律。卽行革退。並將本管番目從嚴懲治。至戴琫之缺。向俱由管官陞補。亦有戴琫子弟及東科爾徑行補放者。充補既無等級。人皆不知勸勵。嗣後總應按照等差。遇有戴琫缺出。卽以如琫拔補。其餘各缺。相擇技藝嫻熟。操防認真者。以次遞陞。其有世家東科爾陞轉。俱屬過優。不由東科爾出身者。拔至定琫而止。嗣後東科爾情願充當番兵及定琫兵目者。准其充伍。按次陞用。不准躡等超

越番兵中如有材技出衆之人。不但拔補定率。仍一體按次陞擢至戴率。如內地營制。果有出色兵丁。即可由行伍出身。以次擢用至提鎮。番兵亦當仿照此例。不得以非東科爾世家。阻其上進之路。如此。定立營制。明示勸懲。庶可武備修明。人知奮勵。一、唐古忒番兵及管兵番目。應分別酌給錢糧。口糧以資養贍也。查藏內調派番兵。從不給與口糧。卽出兵之時。亦不免其徭役。番民被調後。自行備帶口糧前往。糧盡而逃。勢所必至。此次調派番兵。經鄂輝奏明。令商上給與口糧。雖該兵積習相沿。間有逃逸。而臣福康安派守後路熱索橋等處番兵。及成德帶往聶拉木番兵。駐劄數月。逃者甚少。固由嚴行約束。亦緣口食有資。是唐古忒兵非不可振作。茲蒙訓示。以旣用其力。若不給與口糧。自必愈生退縮。令商上給與口糧。如須添補。卽於陽八井沙瑪爾巴家資田產內酌量撥給。添補口糧。並將廓爾喀繳出札什倫布銀兩。留給防兵。今旣不設官兵。卽可爲添補番兵之用。仰見聖主體恤恩慈。昭垂經制。實屬法良意美。應請將此項額設番兵三千名。每年每名給與青稞二石五斗。遇有征調。再照征兵之例。每名每日商上支給糶粃一觔。每年口糧。共需青稞七千五百石。所有此項青稞。平價採買。須銀一萬數千兩。原應前後藏商上給與。但商上除每年額用外。少有贏餘。不能支給。自應遵旨於沙瑪爾巴莊田所出青稞內撥給。而核沙瑪爾巴莊田稞麥。爲數亦有不敷。現據丹津班珠爾之子呈繳歸公莊田五處。又有仲巴田地四塊。合之沙瑪爾巴莊田。每年統共收青稞

三千一百七十石。所少青稞四千三百二十餘石。祇須於廓爾喀交出札什倫布銀兩及沙瑪爾巴各物變價內酌撥銀兩。作為開墾地畝之費。耕種即敷支給。如此辦理。各兵既不至枵腹從事。而以各處歸公之莊田銀兩。為唐古忒兵丁口食之用。天朝並不利其所有。既可贍給兵食。兼可折服番民。於事實為兩得。所有番民挑定額兵者。俱由達賴喇嘛發給執照。免其一家充當烏拉徭役。以示體恤。如有事故革退。仍將執照繳回。至月餉一項。若照屯兵之例。每名每月給銀五錢。計算三千名番兵。每年即需銀一萬九千兩。達賴喇嘛商上。及大招庫內布施較少。每年攢招及念經賞項。即需銀十一萬兩有零。此雖無益之費。但藏內習俗信佛。亦不便徑爾裁減。再加以一切日用置買物價。核算出入。實少贏餘。不能再給番兵月餉。況此等番兵。前此從無給以養贍之事。今既每名每年給青稞二石五斗。免其徭役。又復給以糈糲。較之從前一無所得。相去懸殊。即不給以月餉。已覺欣喜過望。斷不敢再萌奢望。惟管兵大小番目。自當酌予養贍。俾資辦公。除原設戴琫五名。例各給莊田一分。新設戴琫一名。亦令達賴喇嘛照例撥給莊田一處。毋庸再給錢糧外。其如琫番目。照川省馬兵月餉米折之例。每名每年酌給銀三十六兩。甲琫照戰兵之例。每名每年酌給銀二十兩。定琫照守兵之例。每名每年酌給銀十四兩八錢。共需銀二千六百零八兩。為數無多。即由前藏商上支發。此項銀兩。令商上於春秋兩季備文送交駐藏大臣衙門。轉發該管將備。會同戴琫等。傳齊番目支

領。如有侵漁剋扣。一經查出。卽行嚴參治罪。其番兵應支青稞。亦分兩季。令該管將備會同戴琇等。按名散給。一、唐古忒兵丁。應給與軍器火藥。認真操演。明示賞罰。以肅軍紀也。查額設唐古忒兵丁業已議給口糧。並免其徭役。卽與官兵無異。自當遵旨常川訓練。並令各處駐防將備。就近督同大小番目。按期認真教演。駐藏大臣每於巡查之便。親爲較閱。練習純熟者。酌加獎賞。並將該管之番目記名陞擢。如有技藝生疎者。嚴行責懲。屢教不悛。卽予斥革。番目等亦分別責降示懲。駐防將備。俱以所管番兵優劣。由駐藏大臣分別等第。於年班滿時咨部。優等者。咨送本省將軍總督提督。准予保題。仍照舊例陞用。次等者。祇准咨部議敘。毋庸陞用。劣等者。卽行參革。賞罰旣明。軍紀自昭。整肅汛防。可資得力。至向來調派番兵器械鉛火。皆令自備。本屬不成事體。今已設立額兵三千名。每一千名。定以五分鳥鎗。三分弓箭。二分刀矛。將查鈔沙瑪爾巴等家產內器械分給。如有不敷。查向來前後藏大小寺廟中收存較多。俱係番民受戒所繳。應擇其堅利者。商上略如修整。按名分給。所需弓箭。查番民習射者甚多。俱用木弓竹箭。弓力頗勁。尙堪使用。製辦亦屬省便。查沙瑪爾巴費產內。除每年青稞支給番兵外。所餘牛廠徵收酥油。尙可值銀五百五十餘兩。足敷將來製辦弓箭之用。操演所需之鉛丸火藥。查商上每年差人赴工布製辦火藥。邊壩等處。有例交商上鉛觔。存貯布達拉。本屬無用。應卽將每年商上所收之鉛彈火藥。發給番兵。以重操防。一、濟隴、聶拉木等處。

邊界毋庸另派番兵駐守也。查從前訓練章程，祇係託諸空言，並未詳定規制。今廓爾喀經官兵大加懲創之後，革心革面，悔罪投誠，斷不虞再有反覆。臣等查看情形，公同酌議，現在定日江孜爲各邊界來藏要路，已於各該處酌設備弁兵丁，稽查出入。又於每處各額設唐古忒兵共五百名，隨同操演，果能實力奉行，數年之後，漸成勁旅，自足懾服番夷。所有各邊界以及札木地方，竟無庸安設番兵防守。一嚴禁將備弁兵欺凌番兵，並役占番兵之弊，以實營伍也。竊臣前奉諭旨，令臣惠齡慎選出色頭等員弁，派駐西藏，並准駐藏大臣驗看，駁換務使派駐官員與唐古忒兵丁聯爲一體，實爲永靖邊隅之道。現在應換將備，臣等卽於隨征滿漢營員內挑選充補，嗣後換前後藏及定日江孜官員兵丁，總令四川總督遵旨揀選出色頭等員弁，派來駐藏，不得以平庸之員充數。駐藏大臣亦當公同驗看，不得稍有徇隱。如有營私舞弊，欺凌唐古忒兵丁等事，令戴琿等稟知駐藏大臣，隨時嚴辦。設該戴琿等操防怠惰，苦累番民，亦令將備等稟明究辦。如此互相鈐制，庶彼此各知顧忌，不致徇私戩法。日久弊生，至新設之番兵三千名，俱係定額實數，該管將備及戴琿等不得擅行占役。若於例外私令跟隨服役，轉致差陪乏人，一經查出，卽行從嚴治罪。

又具奏，臣等籌議在邊界設兵控禦，或於各臺駐藏換班兵內，以及打箭爐以外臺站官兵，量爲抽撥。聖訓周詳，無微不至。惟是藏地向來設有汛防，其外番人等往來自便，毫無稽查，實屬不成事體。

現在扼要總路共有兩處一係江孜地方與定結帕克哩噶爾達相通爲布魯克巴哲孟雄宗木等處部落來藏要路且自江孜至薩迦溝行走又可繞往聶拉木一帶邊界一係定日地方爲聶拉木濟隴絨轄要路又可通往薩喀等處途逕紛歧惟定日江孜兩處爲各部落來藏咽喉必經之路應於江孜添設一汛派守備一員外委一員帶兵三十名駐劄又於定日添設一汛派守備一員把總一員外委一員帶兵四十名駐劄所有添設巡查官弁兵丁應遵旨於藏內及臺站兵丁內抽撥查前藏駐劄遊擊一員守備一員千總二員把總三員外委五員兵四百五十五名後藏駐劄都司一員外委一員兵一百五十名打箭鑪以外共設遊擊一員都司一員守備三員千總二員把總七員外委九員兵八百三十二名應於東臺站內查無夾壩出沒之地及後藏兵丁內尙可酌量抽撥臣等公同籌議擬於察木多抽撥兵四十名拉里抽撥十名後藏抽撥十名以上共抽撥兵六十名應得之項俱照西藏防兵定例支給其應撥調之守備二員把總一員外委二員照例由川省派出所有官員兵丁俱於現在隨征官兵內挑派前往仍照前後藏駐防之例班滿更換所需房屋查明於定日江孜營官寨之旁各撥數十間用資棲止毋庸動項添蓋至藏內不必另議增添統交駐藏大臣督率將弁勤加操演新添之定日江孜汛兵亦卽於駐藏大臣巡查之便就近查驗操防以肅營伍等因經軍機大臣議覆具奏奉硃批依議欽此

又會奏章程內開。一、駐藏大臣每年應親身巡查邊境。以重地方也。查駐藏大臣同在前藏。其駐劄相近之處。尙易稽查。而前藏迤西。直至邊界一帶。地方遼闊。耳目難周。後藏江孜。定日。又有新設番兵。與該二汛綠營官兵。均應駐藏大臣親加較閱。核其勤惰。以示勸懲。濟隴。聶拉木等處邊界。現已定立界址。亦須周徧巡查。方可諳習情形。遇事庶有把握。本擬駐藏大臣二人。按季輪流前往。但藏地入夏以後。農事正忙。甫交冬令。冰雪已盛。且邊界距前藏甚遠。往返約需兩月有餘。若駐藏大臣四季輪往。未免諸多窒礙。應請於春秋兩季。奏明輪流前往後藏。巡視邊界。順便操演番兵。經過地方。如有駐防官弁等。苦累兵丁番民者。准其呈控。駐藏大臣隨地查辦懲治。至駐藏大臣所用烏拉人夫。俱令自行給價。不得擾累番民。以示體卹。一、駐藏大臣衙門。及文武各員。酌定聽差兵丁數目。以實操防也。查西藏戍兵。原因鎮守地方而設。若大臣官員等多挑兵丁使喚。必致操演乏人。殊屬不成事體。此等應差兵丁。從前原無定額。今將各處應差兵丁。遵旨再加裁減。庶在藏兵丁皆歸實用。不致有名無實。應請嗣後駐藏大臣衙門應差兵丁。每處三十名。遊擊八名。都司六名。守備二員。每員四名。駐藏司員四名。筆帖式二名。千總把總每員一名。前藏糧員酌定看庫兵丁八名。其新設之後藏文員。毋庸給與統計應差兵丁。不過百餘名而止。每遇操演日朝。仍著一體操演。毋許藉口應差。致有曠廢。如此。則營伍制度。愈昭整肅。等因。經軍機大臣議覆。具奏。奉硃批。依議。欽此。

十二月又會奏章程內開一、西藏官兵所需火藥應就本地配造以節糜費也。查駐藏官兵每年操演共需火藥二千餘觔向由內地各營配造運送來藏雖工料自有定價而打箭爐運至前藏需用腳價較多經過番地亦不免有偷竊之弊。臣福康安到藏時查得工布地方產磺布達拉現存火藥即係該處配造隨卽差弁前往製造曾經奏明將來火藥如藏地可以就近製辦卽不必由川省遠解來藏致費腳價。茲查工布製造火藥每百觔共價銀二十三兩有零所用工料雖較內地昂貴而所用腳價較之內地運來節省至三十餘倍之多兩相比較仍係在藏配製大有節省所有軍需案內運來火藥已到西藏者除軍營用去外尙有餘存現在飭查觔數令各糧員分運前後藏擇高燥地方收貯儘足供數年操演之用尙可毋庸配製俟將現存火藥將次用竣祇敷兩年備用之時再行在藏配造若由駐藏遊擊派人前往工布恐所遣之人未妥或致擾累番民並慮有私造透漏之弊應核定每年操演火藥數目由駐藏大臣衙門發給印票交噶布倫差派誠實番目前赴工布地方製造解送來藏至藏地產鉛甚少現有軍營存贍鉛丸堪以應用俟將次用完時再由川省運解操演火繩亦照向例由川省運解又內地解來弓箭除軍營應用外亦有存餘應並留存前後藏撥給官兵作爲操防之用又後藏向無礮位現於臣福康安進兵時所鑄銅礮十三尊內撥給二尊令於操演時試演準頭其餘俱交布達拉存貯等因具奏奉硃批諸凡皆妥欽此。

五十八年四月工部尙書和琳副都統成德具奏爲前藏新設番兵挑選足額一律操演並赴後藏較閱各緣由恭摺奏聞事竊_臣等奏請添設唐古忒兵丁三千名分設前後藏定日江孜等處駐防前經軍機大臣議奏奉旨依議欽此欽遵在案查藏中舊例一切兵役總係按戶口分派番民愚蠢若不將皇上格外恩施令商上給與口糧及免其徭役如有人材出衆之人一體按次陞拔之處明白曉諭番民等必不能踴躍從事是以_臣等逐條頒發告示遍懸村落去後一月之間紛紛投首情願充當兵丁者甚多茲據前藏遊擊逐一揀選年富力強者一千名造具花名清冊呈報_臣等公同點驗俱屬年輕壯健堪以充伍且各番兵皆自備有鳥鎗弓箭刀矛雖與綠營樣式不一但番民習用既慣自可毋庸更換以節糜費今照奏定五分鳥鎗三分弓箭二分刀矛之例令與駐藏兵丁一齊操演_臣等頻加驗閱已覺漸次可觀現在選派綠營熟手數名作爲教習每日試演_臣等察其熟習者酌加賞賚生疎者量予責懲再過數月可望均成勁旅_臣等伏思唐古忒兵民向無分別今新挑額設之兵常川操練卽與綠營兵丁無異若與番民無有區別誠恐日久復有逃匿等事兵民難處難以稽查因趁立法之初諭令鬃頭番兵無不樂從目下皆已鬃髮再查綠營例有號衣號帽旗幟等件所以肅觀瞻而昭區別今唐古忒兵民裝束如一未爲妥協如爲之另製號衣號帽所費未免過多莫如因地制宜衣帽仍照唐古忒式樣擬令鳥鎗兵穿紅褐背心弓箭兵穿白褐背心刀矛

兵穿白褐紅邊背心。各書番兵二字。以爲分別。計所需紅白褐物價無多。臣和琳現在已於養廉內照數捐辦。再後藏及江孜。定日。應設番兵二千名。據都司守備等呈稟。已挑有十分之七。均可足額。等語。查新定章程。駐藏大臣於春秋二季輪流前往閱邊。察看設立鄂博。順道較閱營伍。在案。今臣成德現無別事。應即起程。前赴各邊界。巡查鄂博。點驗江孜。定日。新挑番兵。統俟。臣成德查明。另行具奏。再據各營官具稟。濟隴。聶拉木官寨陸續興修。已有十之七八。臣成德巡查之便。應即逐一履勘。務使堅固完善。以期經久。等因具奏。奉硃批。諸凡皆妥。知道了。欽此。

六日。又會奏。爲查閱後藏各邊界新設番兵。及履勘鄂博情形。臣成德前與和琳通盤計議。江孜爲前後藏往來通衢。新設漢官番兵駐防。足資稽查。毋庸設卡。惟定日地方遼闊。爲聶拉木。宗喀。絨轄三處總匯之地。實爲緊要。查所通絨轄之小路。轄爾多。通宗喀之小路。擦木達。杏嶺。通聶拉木之小路。古喇。噶木。炯。並宗喀。共計五處。均爲要隘。每處設定瑋一名。番兵二十五名。即於定日現設番兵五百名內。就近派撥安設。似於聲勢更爲聯絡。亦不妨其隨時操演。臣於派撥後。量加獎賞。隨赴交界處所。逐一挨查。被兵後。新修察落。均已完竣。尙屬堅固。足資棲止守禦。各邊界外所立鄂博。亦俱堆立齊整。等因具奏。奉硃批。欣慰覽之。欽此。

七月。又會奏。爲查閱帕克哩。定結各卡隘情形。查噶爾達地方卡隘二處。一名撒迦嶺。一名春堆。此

二處均與廓爾喀相通。又定結地方卡隘一處。地名擢拉山。此處與廓爾喀、哲孟雄兩路相通。又帕克哩地方卡隘三處。一名哲孟山。與布魯克巴相通。一名哈爾山。與布魯克巴小路相通。一名宗木山。與宗木相連。以上卡隘六處。均歸江孜前後藏大道。爲總匯要隘。前臣等會同福康安於江孜奏添守備一員駐防之時。隨公同商酌於此六處設立卡隘。派撥番兵分防巡守。今臣成德親赴各處逐一查勘。點驗番兵。極其嚴密。等因具奏。奉硃批知道了。欽此。

五十九年五月。工部尙書和琳。內閣學士和甯。會奏查閱過後藏漢番官兵及地方甯謐情形。夾片內開。查五十七年。福康安等奏定章程。每年春秋二季。駐藏大臣分往各邊界巡閱一次。順道閱兵。等因。軍機大臣議准在案。彼時臣和琳係會辦之人。緣廓藩初服。邊疆甫定。須得大臣前往巡閱。藉以彈壓起見。現今二載有餘。託賴皇上洪福。天威廓藩。極其小心恭順。其餘邊外。如哲孟雄各小部落。仰息於人。斷無他慮。又經臣和琳各處堆立鄂博。境界分明。可期無事。更查衛藏地方較冷。三四月間。方始播種。八九月內。收割。凡巡閱之期。正番民農忙之候。雖減從輕騎。一切照例發與價值。而所用烏拉人夫。在所不免。況邊境俱極甯謐。衛藏凍凍奉約束。臣等公同商酌。似應請旨。嗣後駐藏大臣。每年於五六月間農閒之時。閱邊看兵一次。既不致營伍廢弛。亦不致有妨農業。是否有當。伏祈聖訓。等因具奏。奉硃批。是知道了。欽此。

衛藏通志卷九

鎮撫原目作職掌

謹案。衛藏事務。向由商上自行經理。自乾隆五十七年欽定章程。一切大小事件。統歸駐藏大臣辦理。責任綦重。今彙纂鎮撫一門。以昭遵守。

乾隆五十七年八月二十七日。奉上諭。向來大臣內。才堪辦事之人。多留京供職。其從前派往駐藏辦事。多係中材。謹飭之員。該大臣等前往居住。不過遷延歲月。冀圖班滿回京。是以藏中諸事。任聽達賴喇嘛及噶布倫等率意徑行。大臣等不但不能照管。亦並不預聞。是駐藏大臣竟成虛設。嗣後藏中諸事。皆當隸駐藏大臣管束料理。如遇出有噶布倫、商卓特巴、第巴、戴琿等缺。皆應歸駐藏大臣秉公揀放奏補。自當妥立章程。俾資經久。不得仍前任聽達賴喇嘛、噶布倫等專擅。以致滋生弊端。欽此。

又奉上諭。布達拉、札什倫布兩處商上。向不歸駐藏大臣經管。達賴喇嘛、班禪額爾德尼平素自奉。以及例需應用各項。俱聽其自便。今改隸駐藏大臣總理。亦不可過於嚴切。應如在京派令經管阿哥等位家務大臣相似。不過代其稽查出納。不至如從前爲達賴喇嘛、班禪額爾德尼弟兄親族。暨商卓特巴等藉

端侵漁。至達賴喇嘛、班禪額爾德尼自行支用。不可管束太過。以示體恤。欽此。又奉上諭。前後藏所出租賦。向歸達賴喇嘛、班禪額爾德尼收用。又衆蒙古平素崇信佛教。樂施喜捨。是以布達拉、札什倫布兩處商上。蓄積稍裕。駐藏大臣向不過問。其商卓特巴、噶布倫等任意侵蝕。如商卓特巴、及丹津班珠爾、札什敦珠布等。皆家計富足。皆從何來。若非侵漁積累。何由各擁厚貲。嗣後商上一切收支。應令駐藏大臣總核。凡換班官兵。以及駐藏大臣官用。己用。皆不得於商上稍有侵那。其兩處商上出息。養贍喇嘛番衆外。或有贏餘。不妨於唐古忒兵丁添補養贍之用。福康安等當向達賴喇嘛等面爲勸諭。以大皇帝統屬萬方。受其貢賦。除每年賞給官員廉俸、兵丁錢糧外。遇有水旱偏災。賑恤蠲貸。並建築海塘河堤各工程。所費不下億萬萬。從無靳惜。又普免天下錢糧四次。漕米二次。亦不下億萬萬。斷無將天下貢賦悉入內帑。不養天下百姓之理。爾達賴喇嘛管轄衛藏。雖不敢比大皇帝統屬萬方。但即小可以喻大。亦宜思似此存心。譬如前輩班禪於四十五年進京。蒙大皇帝賞賜駢蕃。在京沿途所得。及各蒙古布施。又復不費。總計不下百餘萬。若回後藏後。於所得羨餘。酌爲施濟。何致爲賊匪垂涎。乃呼畢勒罕年幼。仲巴等又知聚而不知散。以致沙瑪爾巴聞而生心。唆使賊匪前至札什倫布。搶掠一空。多藏厚亡。盈虛消息。理有固然。卽比佛法而論。亦當以施捨爲心。錢財貨物。皆係身外之物。在俗家尙不容吝。況出家人以空寂爲務者乎。當知波羅蜜中施捨爲第一。此後商上若有羨餘。達賴喇嘛、班禪額爾德

尼不可作爲己有。並不得專給喇嘛。務須普給番衆。俾僧俗聯爲一體。以期同心保護衛藏。或計算商上支用之外。再有羨餘。不妨亦免衛藏番衆賦納。則人心更爲悅服。倍資得力。欽此。

十一月。大學士公福康安等會奏。衛藏一切。本應駐藏大臣管理。乃向來駐藏大臣。惟資坐鎮。不復預聞。積習相沿已久。噶布倫等因達賴喇嘛清淨焚修。不能留心公事。遂假借達賴喇嘛聲勢。營私舞弊。諸事擅專。前此駐藏大臣。又復不諳大體。一切委之達賴喇嘛。轉付噶布倫等。任所欲爲。以致藏務日就廢弛。今當嚴定章程之時。必須革除積弊。方可大加整飭。查回疆駐劄大臣。一切皆歸衡奪。其阿奇本伯克等。遵照奉行。駐藏大臣職分相同。嗣後駐藏大臣。督辦藏內事務。應與達賴喇嘛。班禪額爾德尼平等。自噶布倫以下。番目及管事喇嘛。分係屬員。事無大小。均應稟駐藏大臣辦理。以肅紀綱。至札什倫布諸務。現因班禪額爾德尼年幼。係歲琿堪布代管。凡遇一切公事。亦令一體稟知駐藏大臣辦理。並於巡邊之便。就近稽查管束。庶衛藏事權歸一。積弊可以永除矣。又會奏。爲酌定稽查商上收支。並勸諭達賴喇嘛酌蠲賦納。普惠番衆事。等。欽奉諭旨。布達拉。札什倫布兩處商上收支一切。應令駐藏大臣。綜核稽查出入。不至如從前侵漁。至達賴喇嘛。班禪額爾德尼自用公用各項。仍舊聽其自行支用。不可管束太過等因。欽此。等公同查核。達賴喇嘛所屬前後藏地方。較爲寬廣。每年番民交納。係以糴石。或以氈毯。大綿。鹽觔。酥酒。奶渣。羊腔。茶葉等項。

作爲租賦。其遠處寨落難以運者。各以銀錢折交。惟番民有牛羊羣者。係每牛二頭。每年交銀錢一圓。每羊十隻。每年亦交銀錢一圓。其隨時布施物件銀兩。並無定數。除交各項本色外。約計所入銀兩。共有十二萬七千有零。凡有交來物件。銀兩銀錢。俱係收存大招庫內。有商卓特巴三名管理。其糴糴、藏香、及稅課罰贖之項。各處布施之物。並番民故後例交一半服飾物件。俱交商上庫內。另有商卓特巴二名管理。所有達賴喇嘛公用等項。悉皆取給於此。計算用項。每年正月內。布達拉與各大寺廟大小衆喇嘛。及前後藏各處喇嘛數萬人。會集大招念經二十日。謂之默朗穆勒布。二月內。復集大招念經八日。謂之錯四勒布。藏俗謂之攢招。按喇嘛名數。賞給銀錢。哈達。支給酥油、茶葉、糴糴。需銀七萬九百餘兩。又每日念經需用酥油、茶葉。及各項賞賚。每年共需銀三萬九千二百餘兩。又每年採買布達拉衆喇嘛食用。及各種物料。並酬答布施物件。共需銀二萬四千四百餘兩。所入尙不敷所出。又色拉等大寺喇嘛。均須養贍。若青稞豐收之年。並布達拉布施較多年分。始有贏餘。商上又有小庫一處。另派商卓特巴一名經管。每年出入。如有贏餘物件銀兩。歸入小庫存貯。如遇不敷之年。即將小庫內銀物使用。一切用度。商卓特巴總司出納。亦向噶布倫等呈報。前此駐藏大臣從不過問。而達賴喇嘛親族及商卓特巴等。侵漁舞弊。在所不免。現在商卓特巴等缺。議歸駐藏大臣會同達賴喇嘛秉公揀放。不許達賴喇嘛親族管事。所有商上一切公用。又奉旨令駐藏大臣

總核實可杜絕弊源。敬維聖意以達賴喇嘛係出世之人，不諳俗務，疎於查察，左右用事，或致串通商卓特巴等乘機舞弊。現在商上本非豐裕之時，若再爲人侵蝕，達賴喇嘛出入用度，更形竭蹶。是以仰履聖懷，特命代爲查核，使其管事之人，知所顧忌。達賴喇嘛受此恩慈，自深欽感。臣等查濟噶呼圖克圖居住布達拉耳目更近，一切弊竇無難就近確查。應交駐藏大臣與濟噶呼圖克圖隨時稽核出納。如有侵漁舞弊之人，濟噶呼圖克圖卽告知駐藏大臣查辦治罪。至札什倫布所管番民較前藏爲少，所交商上糧賦多係交納物件，統計折色本色約合銀六萬六千九百餘兩，而每年所用約需銀七萬四千六百餘兩。從前各處布施較多，每年總有贏餘。近年以來，布施甚少，又經廓爾喀搶掠，核計每年出入連布施計算，僅敷用度。班禪額爾德尼年在幼齡，恐爲左右朦混，亦當駐藏大臣及濟噶呼圖克圖實力稽核，以歸畫一。所有達賴喇嘛、班禪額爾德尼平素自奉以及例應需用各項，自應欽遵諭旨，照舊聽其自便，不敢過於嚴切，以仰副聖慈體恤。再達賴喇嘛商上入項及各處布施，若有贏餘，自應發心施捨，惠及番衆。臣福康安奏明濟噶、聶拉木、絨轄等處被賊侵擾日久，應告知達賴喇嘛酌免各該處租賦一兩年，以紓民力。據達賴喇嘛回稱，查明上年被擾地方，除濟噶、聶拉木、絨轄三處酌免兩年租賦外，其餘若宗喀、定日、噶爾達、春堆等處亦擬酌免租賦一年，休養民力。再闔藏每年俱有欠交租賦，擬將五十六年以前積欠全行蠲免。仰賴大皇帝洪福，黃教

振興商上一有羨餘隨時酌量或予緩征或免衛藏賦納普惠番衆等語臣等詳加體察達賴喇嘛經此一番規勸極知欽仰聖主恩慈此後竟能常存此心使僧俗聯爲一體同心保護衛藏自必改觀等因具奏奉硃批欣慰覽之餘有旨欽此

十二月具奏章程內開一達賴喇嘛班禪額爾德尼與外番通信應告知駐藏大臣詳細商酌也查西藏地方與外番之廓爾喀布魯克巴哲孟雄宗木等處部落皆係接壤向來外番人等來藏或係布施或係講論事務達賴喇嘛等發給書信原無禁例但立言不得大體易爲外番所輕卽如上次廓爾喀滋事之前曾寄信與達賴喇嘛講論銀錢辦理不能妥協致使藉詞尋衅今廓爾喀業已悔罪投誠將來遇有稟請之事均應由駐藏大臣主持與達賴喇嘛等商同妥協辦理卽將來廓爾喀部長頭目欲專人來藏於達賴喇嘛班禪額爾德尼前呈送土物謝禮亦應令駐藏大臣代爲酌定回諭方可發給以昭體例平日如有關係地方事件俱應聽駐藏大臣辦理其餘通問布施書信亦應報明駐藏大臣查驗又布魯克巴曾受天朝封號該部落素信紅教每年遣人來藏向達賴喇嘛等呈遞布施哲孟雄宗木洛敏湯等小部落半屬外番半屬藏內羈縻各外番部落差人赴藏至達賴喇嘛班禪額爾德尼處布施通問雖不必概爲禁絕仍應立法稽查嗣後各外番部落差人來藏者由邊界營官查明人數稟報駐藏大臣驗放進口並令江孜定日駐劄備弁實力稽查到藏瞻禮

後所有各該部落稟駐藏大臣者由駐藏大臣給諭其呈達賴喇嘛等稟帖俱應呈送駐藏大臣譯出查驗由駐藏大臣與達賴喇嘛將諭帖酌定發給查點人數再行遣回至噶布倫係達賴喇嘛管事之人不准與各部落私行通信即各部落有寄信與噶布倫者亦令呈送駐藏大臣與達賴喇嘛商同給諭噶布倫等不准私行發信庶內外之防益昭嚴密

又具奏一蒙古延請喇嘛誦經應由駐藏大臣給照前往以資查考查向來青海蒙古王公等差人赴藏延請通習經典喇嘛赴該游牧地方誦經教經有稟知駐藏大臣前往者亦有私行前往者漫無稽考在青海蒙古等久涵聖澤備位藩封與內地臣僕無異原不必定以限制但經過三十九族番地即與各外番相通若任其私相往來恐諸弊即由此而生殊多未便嗣後凡遇蒙古王公等延請喇嘛誦經者俱令西甯等處大臣行文來藏再由駐藏大臣給與執照並咨明西甯辦事大臣以資查考其前往各處外番朝山禮塔喇嘛及赴蒙古地方募化者亦必須稟明駐藏大臣領照方准前往設有私往者將該管之喇嘛堪布等一體查究

又具奏一駐藏大臣衙門應設譯寫廓爾喀番字通事大役也查駐藏大臣衙門向設譯字房通事各一名祇有譯寫唐古忒字之人從不通曉廓爾喀字跡語言即唐古忒番民內亦惟近邊一帶尚通廓爾喀語竟無一人能識番字者查巴勒布與廓爾喀語言字跡雖殊尚有兼通之人臣福康安

等進兵時。奏明於巴勒布商人中。擇其誠實可信者。帶往軍營。備譯番粟。其諳習廓爾喀語言之邊界番民。亦酌帶數人。作爲通事。傳譯語言。俱令互相比對。以免舛誤。今廓爾喀投誠向化。按期入貢。自有早遞駐藏大臣稟帖。應請添設廓爾喀譯字人役一名。通曉廓爾喀語言通事一名。另派唐古忒番民三四名。令其學習廓爾喀番語字跡。以備將來充補應役。查向例通事譯字二名。每名日支口糧銀六分。四釐三絲九毫。仍請照舊例支給。

又具奏一。駐藏大臣衙門繕寫清字滿洲兵丁。向來祇設有四名。分派兩衙門。未免不敷。應於成都駐防滿洲兵丁內。再添派四名來藏。應得錢糧分例。換班年分。俱照向例辦理。仍於前藏漢兵內裁去四名。以符額數等因。經軍機大臣議復具奏。奉旨依議。欽此。

謹案乾隆十五年以前。駐藏大臣接任卸事年月。因珠爾墨特那木札爾不法。冊檔無存。今將自十五年起。至五十九年止。奉旨駐藏辦事大臣銜名。按年編纂。

工部侍郎那木札爾。乾隆十五年
年到藏。

副都統班第。乾隆十五年
年到藏。

副都統多爾濟。乾隆十六年五月
到任。換班第回京。

副都統舒春。乾隆十七年七月到任。換那木札爾回京。

成都副都統薩拉善。乾隆十九年五月到任。換多爾濟回京。

將軍、誠毅伯伍彌泰。乾隆二十一年四月到任。換舒春回京。

副都統官保。乾隆二十二年十二月到任。換薩拉善回京。

西甯副都統積福。乾隆二十四年閏六月到任。換伍彌泰回京。

副都統輔鼎。乾隆二十六年四月到任。換官保回京。

都統傅景。乾隆二十七年閏五月到任。換積福回京。

副都統阿彌勒圖。乾隆二十九年六月到任。換輔鼎回京。

都統瑪瑞。乾隆三十年九月到任。換傅景回京。

都統官 保。乾隆三十一年十月到任。
接阿彌勒圖病故遺缺

成都副都統托 雲。乾隆三十二年到任。
任換瑪瑞回京。

護軍統領莽古賚。乾隆三十三年二月到任。
任換官保回京。

副都統常 在。乾隆三十五年正月到任。
任換托雲回京。

副都統索 琳。乾隆三十六年六月到任。
任接常在病故遺缺。

副都統恆 秀。乾隆三十八年五月到任。
任換索琳回京。

誠毅伯伍彌泰。乾隆三十九年四月到任。
任換莽古賚回京。

副都統留保住。乾隆四十一年二月到任。
任換伍彌泰回京。

副都統恆 瑞。乾隆四十二年三月到任。
任換恆秀回京。

副都統索琳。乾隆四十四年四月到任。換留保住回京。

副都統保泰。乾隆四十五年七月到任。接索琳病故遺缺。

侍郎博清額。乾隆四十六年九月到任。換恆瑞回京。

誠勇公慶麟。乾隆四十八年八月到任。換保泰回京。

副都統留保住。乾隆五十年四月到任。接博清額病故遺缺。

副都統雅滿泰。乾隆五十一年五月到任。換留保住回京。

成都副都統佛智。乾隆五十三年十二月到任。接慶麟革職之缺。

侍郎巴忠。乾隆五十四年正月到任。接雅滿泰降級之缺。

伊犁參贊大臣舒濂。乾隆五十四年二月到任。換佛智回京。

青海副都統普

福。乾隆五十四年五月到任。換巴忠回京。

阿克蘇領隊大臣雅滿泰

乾隆五十五年十月到任。接舒濂革職之缺。

察哈爾都統保

泰。乾隆五十五年十一月到任。接普福降級之缺。

成都將軍成

德。乾隆五十六年十月到任。接保泰革職之缺。

四川總督鄂

輝。乾隆五十六年十一月到任。接成德出征卸事之缺。

副都統舒

濂。乾隆五十六年十二月到任。接鄂輝卸事之缺。

副都統鄂

輝。乾隆五十六年十一月到任。接雅滿泰革職之缺。

頭等侍衛額爾登保

乾隆五十六年十二月到任。接舒濂病故遺缺。

工部尚書和

琳。乾隆五十七年閏四月到任。接額爾登保出征卸事之缺。

副都統成

德。乾隆五十七年十二月到任。接鄂輝革職之缺。

內閣學士副都統和

甯。乾隆五十九年三月到任。換成德回京。

工部尙書都統松

筠。乾隆五十九年十二月到任。換四川總督和琳赴任。

衛藏通志卷十

錢法

謹案衛藏地方向係由廓爾喀鑄造番錢。運來行使。仍兌換銀兩運回。自乾隆五十七年欽奉諭旨。在藏安設鑪座。派員監造乾隆寶藏銀錢。其廓爾喀番錢。永遠停止。今照依編纂。

乾隆五十七年十一月。大學士公福康安等會奏。爲酌定鼓鑄銀錢章程。仰祈聖訓事。竊上年九月內。欽奉諭旨。廓爾喀所鑄錢文。衛藏竟可毋庸行使。莫若西藏地方安設鑪座。派撥官匠鼓鑄。用唐古特字模鑄寶藏字樣。通行使用等因。欽此。茲復欽奉諭旨。藏內設鑪改鑄寶藏字樣銅錢。所有廓爾喀銀錢。嗣後作爲銀兩。用完銷除等因。欽此。仰見我皇上惠敷遠徼。使商利民至意。伏思衛藏久隸版圖。原應通行國寶。若有銅礦可開。無難就近採辦。設鑪鼓鑄。惟是藏地素不產銅。向來成造佛像。俱用巴勒布商人販來銅器。銷毀鑄造。每觔價銀六錢零。若有不敷。再赴裏塘西南二十日路程。雲南所屬之吉當番地。收買熟銅。每銅一觔。價銀八錢零。每年鑄佛。約買熟銅四五千觔。卽需價銀三四千兩。腳價仍不在內。藏地山上並無林木。偶有些小柴枝。炭質脆薄。不能燒煉生銅。若設鑪鼓

鑄寶藏錢文銅筋必須運自滇省。而滇銅開採日久。近來礦苗漸欠旺盛。僅敷京局及各省採辦。恐難冀供西藏鼓鑄。自滇至藏。一路崇山峻嶺。不能水運。腳價實屬不貲。計算採買銅價。並柴炭人工腳價等項。較之內地。加至數十倍。更須由內地撥運整項。添設官員匠役。煩費滋多。即使通行使用。成本已難合算。況藏地拉哩西通各部落。番民習使銀錢。驟難更易。即內地銅錢。亦祇行至打箭爐而止。自打箭爐直至拉哩。全係使用碎銀。藏內鑄出銅錢。仍恐不能行使。糜費更爲不值。查從前商上並不鑄造銀錢。專賴廓爾喀運來易換。因所鑄新錢成色較高。遂而居奇擡價。欲以一圓當作兩圓行使。上年經成德奏明。以軍興需用。由商上鑄造銀錢。一律通行。商民稱便。今廓爾喀畏威悔罪。經臣福康安堅明約束。不敢再提一圓當兩圓之語。已可永無異議。若藏內自鑄銀錢使用。使廓爾喀無所居奇。即將來仰蒙恩准。復通貿易。商民交易公平。更可經久無弊。至於銀錢成色。向來每錢一圓。重一錢五分。總係撻銅成色。過於低潮。今若勒令全無撻雜。按照輕重兌換銀兩。則工價炭火等項。賠貼太多。不免大虧成本。如准其酌量撻銅。即嚴定限制。而日久弊生。更屬難於稽查。應請嗣後商上鑄造銀錢。純用紋銀成造。不得絲毫撻雜。每圓仍重一錢五分。紋銀一兩。祇換銀錢六圓。是銀錢計重九錢。易銀一兩。以多出一錢。作爲鑄錢工本。並另鑄一錢之銀錢一種。每兩易換九圓。五分之銀錢一種。每兩易換十八圓。均有一錢餘賸。成色既無高下之殊。鼓鑄亦免貼賠之累。可期永

遠通行。卽廓爾喀所鑄錢文。同係紋銀。彼此均無所藉口。所有巴勒布舊錢。與商上原鑄錢文。每圓總有銅二三分。成色較低。今若概令繳銷。勢所不能。祇應將商上原錢。及巴勒布舊錢。議令每紋銀一兩。易換八圓。與嗣後鼓鑄足色銀錢。示以區別。以昭平允。至商上鑄錢工匠物料。俱由商上備辦。將易換銀兩所餘之一錢。作爲工本。自行經理。毋庸動用官項。仍交駐藏大臣。派員督同噶布倫等。監造。驗看成色。不許稍有攙雜。錢上正面輪廓上。用唐古特字模鑄乾隆通寶字樣。背面用唐古特字模鑄寶藏字樣。以昭我國家同軌同文之盛。並於正面中間。逐年鑄出造錢年分。用資查考。設有攙銅情弊。卽行按年查出。將監造之員。及該管之噶布倫。鑄錢之孜琿。濟仲。並匠役等。從嚴究問。罰賠治罪等。因具奏。奉上諭。福康安等奏藏內鼓鑄銀錢章程。亦祇可如此辦理。藏內既不產銅。所需鼓鑄錢文銅觔。仍須向滇省採買。至藏一路崇山峻嶺。購運維艱。自不若仍鑄銀錢。較爲省便。但閱所繪錢模。正面乾隆寶藏四字。背面鑄寶藏二字。俱用唐古特字模模印。並無漢字。於同文規制。尙爲未協。所鑄銀錢。正面用漢字鑄乾隆寶藏四字。背面用唐古特字。亦鑄乾隆寶藏四字。以昭同文。而符體制。已另行模繪錢式。發去遵辦。欽此。

又會奏。前藏鼓鑄銀錢。最關緊要。應請於前藏內再添糧務一員。於同知。知州。知縣內派來。專管監造銀錢事務。由四川總督揀明白勤慎之人。赴藏佐理。以到藏之日起。一年一換。以便按年稽查銀

錢成色。如果勤慎出力。由駐藏大臣保奏。倘敢徇私舞弊。卽行嚴參辦理。又專派鑄錢仔瑋二名。濟仲喇嘛二名。以專責成。又查商上新鑄銀錢。不准絲毫攙雜。成色較高。通行使用。商民稱便。惟查番寨租賦。有以銀錢折交物件者。若商上收納不公。勢必苦累番民。嗣後商上收納銀錢數目。及採買各物。亦照所定兌換之數。按新鑄舊鑄分別折收。不得稍有浮多。以致人心不服等因。經軍機大臣議准在案。

五十八年九月。工部尙書和琳。副都統成德。具奏。爲新造乾隆寶藏銀錢。酌量變通。以利番民。仰祈聖鑒事。查從前藏內純用廓爾喀銀錢。以致爲成色高低。滋生事端。去年辦理善後事宜。臣和琳同福康安等。遵奉聖明指示。改鑄乾隆寶藏十足銀錢。每銀一兩。換一錢五分重六圓。換一錢重九圓。換五分重十八圓。餘銀一錢。作爲人工火食。其攙銅舊錢。每銀一兩。准換八圓。俱經軍機大臣議覆。奉旨允行在案。臣等初議。原恐廓爾喀商人到藏。唐古特到廓爾喀。彼此交易。皆係足色紋銀。斷不致再有齟齬起見。現在已行一年。有餘。廓爾喀貿易之人。在藏買賣。未嘗不用銀錢。臨行皆係易銀。而往卽唐古特貿易之人。回藏。亦係易銀前來。是兩處銀錢。彼此皆不出境。亦屬甚便。藏中僧俗番民。及克什米爾。巴勒布商人。並內地漢商兵丁等。下餘無知。不論銀之成色高低。單論錢之兌換多寡。自去年迄今。攙銅舊錢與新鑄之一錢重及五分重者。暢行無滯。惟一錢五分重新錢。因換六圓。

之故。竟覺停積。臣等再四思維。錢法原以通商便民。不敢因係臣和琳議奏在前。稍存回護。試令監造銀錢局員。暫將一錢五分重銀錢停鑄。一面出示。每銀一兩。仍准兌換一錢重新錢九圓五分重。新銀錢十八圓。舊錢雖係一錢五分重。亦一例准換九圓。試行一月有餘。現在上下稱便。新舊通行。相應奏明。嗣後毋庸再鑄一錢五分重銀錢。庶商上成本有盈無虧。源源接濟。可以永遠奉行等因。具奏。奉硃批。知道了。欽此。

衛藏通志卷十一

貿易

謹案衛藏地方爲外番往來貿易人等薈萃之所。南通布魯克巴，東南通雲南屬之番子，東通四川屬之打箭鑪，以外各土司，北通青海、蒙古，直達西甯，惟西通巴勒布及克什米爾，纏頭番民，常川在藏居住，設塵輿販者最多。自乾隆五十七年廓藩底定，酌議稽查約束章程，統歸駐藏大臣經理，謹照依編纂。

乾隆五十七年十二月，大學士公福康安等會奏，唐古特與外番貿易情形。查上次廓爾喀滋擾，全係沙瑪爾巴主持，實非因貿易啓衅。向來貿易商民，全係巴勒布、克什米爾二種，並無廓爾喀本地之人。藏內一切食用物件，全賴外番，一旦嚴禁商販，實於藏番不便。倘由官爲經理，將貨物等項彙齊運至交界，派員監察，又恐派去員弁藉辭索詐，轉啓弊端。且藏中貿易，俱由巴勒布商夥自行販貨零售。唐古特又無開行承攬之人，無從代爲經理。前經_臣等再四籌畫，請將外番商人來藏者酌定次數，由駐藏大臣給照往來。江孜定日兩汛官弁稽查人數，其邊界零星交易，彼此常有，令該營

官就近隨時約束。毋許私越。自己可便番情。而示限制。至邊界番民與接壤居住之巴勒布番民。就近易換鹽米。至多不過數包。少至升合。未便定以次數限期。此等窮番零星市易。藉謀口食。實與到藏商民興販貨物者不同。不得不分別辦理等因。經軍機大臣議覆具奏。臣等查唐古特與外番貿易一事。前因番民等彼此爭利。易起爭端。節經奉旨令福康安等會同詳議。或竟行停止。或於一歲中酌定兩次。或四次。准其通市。仍當官爲經理等因在案。嗣經福康安等節次奏到善後事宜摺內。所定貿易次數。及稽查邊界出入。抽收稅課章程各條。均經臣等議以貿易一事。尙未議定。請俟福康安等接奉諭旨。覆奏到日。再行核議。亦在案。今據福康安等奏稱。貿易一事。廓爾喀資於藏地之物無多。而藏番日用。必需邊外物件。如米石布疋。果品。香料。銅鐵等物。均需向外番購買。似有難於禁絕之勢。臣福康安係辦此事之人。臣和琳係駐藏大臣。必不肯祇顧目前。稍貽後患等語。是唐古特與外番貿易一事。勢難禁絕。自應照舊通商交市。所有福康安等先後奏到貿易事宜各條。一併核議。據稱查明在藏貿易巴勒布商民四十名。商頭三名。克什米爾商民一百九十七名。商頭三名。向俱任其常川興販。往來不絕。駐藏大臣衙門及達賴喇嘛處並無查考。雖經議派第巴一人管理。仍屬有名無實。嗣後應請查明貿易番回。造具名冊。交駐藏大臣衙門存案。每年巴勒布止准貿易三次。克什米爾止准貿易一次。於前赴外番營販貨時。令商頭呈明駐藏大臣。由何路行走。給與印

照稽查出入等語。均如所奏辦理。又據稱請於緊要總路江孜定日二處設立營汛。各添設備弁駐劄。嗣後貿易出口商民。應令該二汛備弁及營官第巴等驗照放行。其有自外番來藏商民。亦由該二汛官員查明人數。稟報駐藏大臣。到藏後一體按名註冊。立法已爲周密。仍應令駐藏大臣隨時查察。如該商民等或有爭占便宜。不安本分。並江孜定日備弁暨駐藏大臣衙門章京筆帖式。以及該處營官書吏通事人等。有藉端需索。及得錢縱容出入等弊。卽行嚴參究治。以昭懲戒。其布魯克巴、及哲孟雄、宗木等處部落。有欲來藏瞻禮者。往來出入均應一體查察。至所稱邊界番民與接壤居住之巴勒布番民。就近易換鹽米。不過數包。至升合不等。未便定以次數限期等語。此等窮番居住邊界。鄰近外番。不過零星貿易。藉謀口食。與出口及到藏興販者不同。若一概定以次數限期。該番等卽不免生理無資。我皇上加惠番黎。一視同仁。自應如福康安等所奏。毋庸定立次數限期。准其照常貿易。但此等零星貿易。卽在交界處所互相市販。未免漫無稽查。駐藏大臣遠在前藏。又不能紛紛給照。嗣後應令駐藏大臣。飭知該管營官就近約束。嚴行查核。毋許私越。如此酌定章程。既不致經理非人。藉端擾累。亦不致任聽商民營私牟利。於藏內貿易一事。實有裨益。又據稱濟甯拉木抽收稅課。毋庸酌減也。查邊界地方。惟濟甯拉木抽收稅課。尙屬無多。向來收稅則例。凡巴勒布商民運米在邊界售賣者。每米一包。抽取一木碗。每年約收稅米一百數十石。俱運交大昭。以

備攢昭念經之用。唐古特番民零星販出鹽觔。每包亦抽取一木椀。該營官復將所收鹽觔。向巴勒布易換製辦藏香之料。及紙張果品等物。運交商上。至巴勒布商民運米來藏。各物除米石外。其餘並不在邊界納稅。祇由該營官記明包數。稟知貨物商上。到藏後。不論粗細。每包納銀錢一圓。卽金花、緞匹、珊瑚、珍珠、細軟之物。亦皆係按包收稅。惟紅花不以包計算。每一克卽納銀錢一圓。詳核所收稅課。爲數本屬有限。日久相安。並無爭論。今旣蒙恩准通貿易。所有抽收稅課一項。並非從前起。衅根由。若將往例議減。轉似市恩外番。裁抑唐古特。於體制殊有關係。應請將濟隴聶拉木兩處抽收米石鹽觔。及貨物到藏。按包納稅之處。悉照向例辦理等語。臣等酌議。應如所奏辦理。毋庸另議裁減。仍令駐藏大臣隨時稽核商上。毋得稍有加增。以昭平允等因。具奏。奉旨。依議。欽此。

衛藏通志卷十二

條例 原目作章程

謹案自乾隆五十八年欽定章程及大臣奏議均已分載各門謹遵照原案纂成條例彙爲一門以便檢查。

鎮撫

一、駐藏大臣督辦藏內事務應與達賴喇嘛、班禪額爾德尼平等自噶布倫以下番目及管事喇嘛分係屬員事無大小均應稟命駐藏大臣辦理至札什倫布諸務亦俱一體稟知駐藏大臣辦理仍於巡邊之便就近稽查管束。

一、達賴喇嘛、班禪額爾德尼之呼畢勒罕以及前後藏大小呼圖克圖之呼畢勒罕察木多、類烏齊、乍丫、薩喀、西甯等處呼圖克圖之呼畢勒罕一經呈報出世指出數名均由駐藏大臣將其姓名生年月日用清漢唐古忒三樣字繕寫牙籤貯於欽頒金本巴瓶內先期傳喚喇嘛齊集大昭誦經七日屆期駐藏大臣親往監同抽掣。

一、前後藏遇有噶布倫、戴琿、商卓特巴以下大小番目等缺，統歸駐藏大臣會同達賴喇嘛揀選，分別奏補揀放。其達賴喇嘛、班禪額爾德尼之親族人等，概不准干預公事。

一、大寺坐牀堪布喇嘛缺出，俱由駐藏大臣會同達賴喇嘛秉公揀選，給與會印執照，派往住持。其餘小寺堪布喇嘛，聽達賴喇嘛自行揀補。

一、達賴喇嘛所管大小廟宇喇嘛名數，開造清冊，及噶布倫所管衛藏地方各呼圖克圖所管寨落人戶一體造具花名清冊，於駐藏大臣衙門及達賴喇嘛處各存一分，以備稽查。

一、藏內喇嘛前往各外番朝山禮塔者，由駐藏大臣給與照票，限以往還日期，回藏之日，仍將照票繳銷，不得逗留邊外。如有潛行私越者，卽行究治。

一、外番人等來藏布施瞻禮者，由邊界營官查明人數，稟明駐藏大臣，驗放進口。事畢後，查點人數，發給照票，再行遣回。

一、廓爾喀、布魯克巴、哲孟雄、宗木等外番部落，如有稟商地方事件，俱由駐藏大臣主持，其與達賴喇嘛、班禪額爾德尼通問布施書信，俱報明駐藏大臣，譯出查驗，並代爲酌定回書，方可發給。至噶布倫等，不得與外番私行發信。

一、青海蒙古王公等差人赴藏，延請通習經典喇嘛，赴該游牧地方誦經教經者，俱由西甯等處大臣

行文來藏。再由駐藏大臣給與執照。並咨明西甯辦事大臣。以資查考。

一、駐藏大臣每年五六月間奏明輪流一人。前往後藏巡視邊界。操閱番兵。所用烏拉人夫。俱自行給與價值。不得擾累番民。以示體卹。

一、駐藏大臣衙門向例設有唐古忒通事譯字二名。今增設廓爾喀通事譯字二名。共四名。每名每日給支口糧銀六分四釐三絲九毫。另派唐古忒番民三四名。令其學習廓爾喀番語字跡。以備將來充補。

一、廓爾喀在藏學習漢字學生四名。每人每月支給口糧銀五兩。由商上發給。

職掌

一、理藩院司員一員。管理達木蒙古八旗官兵三十九旗番民事務。承辦駐藏大臣衙門清文稿案。三年更換。

一、達木蒙古官兵共五百三十八戶。在藏當差官兵八十三員名。每月商上發給錢糧。其餘俱在達木地方游牧。聽候調遣。

一、達木八旗固山達八員。佐領八員。驍騎校八員。

一、三十九族總百戶一員。百戶十三員。百長五十三員。

一、三十九族共四千八百八十九戶。每戶每年徵收貢馬銀八分。共徵收銀三百九十一兩一錢二分。交納商上。

一、理藩院筆帖式一員。專司駐藏大臣衙門文移繙清譯漢。三年更換。

一、前藏糧務一員。管理倉庫糧餉。承辦駐藏大臣委審案件。三年更換。

一、應支駐藏大臣兩衙門每月豐折加增。及通譯口糧。共銀四百四十三兩零。又應支司員筆帖式二員。每月豐折。通事口糧。共銀八十五兩九錢零。又應支前藏糧務一員。每月折色月費。及通譯口糧。共銀一百三十六兩八錢零。又應支副糧務一員。每月折色月費。及通譯口糧。共銀七十一兩三錢。又應支遊擊一員。每月折色鹽菜。及通事口糧。共銀四十二兩一錢零。又應支守備一員。每月折色鹽菜。共銀三十兩四錢零。又應支千總二員。每月折色鹽菜。共銀三十六兩八錢。又應支把總二員。每月折色鹽菜。共銀三十四兩四錢。又應支外委五員。每月折色鹽菜。共銀四十四兩五錢。又應支兵丁四百五十五名。每月餉銀。共二千二百二十九兩五錢。又應支倉夫六名。每月口糧。共銀十七兩六錢。以上俱小建扣除。

一、應支關帝廟春秋祭祀銀十六兩。又達賴喇嘛每年承領恩賞銀一千兩。俱年終造報。

一、前藏倉額貯青稞二千七百石。小麥三百石。共三千石。

- 一、後藏、江孜、定日分駐官兵二百零八員名，每年共應發月費口糧等項銀一萬二千兩。
 - 一、副糧務一員，專司監造銀錢，一年更換。
 - 一、後藏糧務一員，專司監放番兵口糧及駐藏大臣委查事務，三年更換。
 - 一、拉里糧務一員，管理支放兵餉，承辦該處委審案件，三年更換。
 - 一、拉里各塘汛弁兵三年共需月費口糧銀三萬六千兩零。
 - 一、拉里倉額貯稞麥一千二百石。
 - 一、察木多糧務一員，管理支放兵餉，承辦該處委審案件，三年更換。
 - 一、察木多暨所屬各塘汛官兵三年共需月費口糧銀三萬四千七百兩零。
 - 一、察木多倉額貯稞麥一千二百石。
- 番目
- 一、噶布倫四名，每名每年支俸銀一百兩，大緞四疋，戴琿六名，每年支俸銀五十兩，大緞二疋，由駐藏大臣衙門造具名冊，咨送理藩院，移咨戶部支領。如有陞革事故，一併咨報理藩院查核。
 - 一、噶布倫、戴琿等例得達賴喇嘛撥給寨落莊田，一經缺出，即查明交代與新任接手之人收管，以資辦公，毋得據爲己有。

一、噶布倫係三品頂帶。戴琿、仔琿、商卓特巴係四品頂帶。邊缺營官、大缺營官、如琿、業爾倉巴、協爾幫、郎仔轄、希約第巴係五品頂帶。中缺營官、甲琿、達琿、噶廈大中譯、卓尼爾係六品頂帶。小缺營官、定琿、噶廈小中譯、管門、管草料、管糶糶、管帳房、管柴薪、管牛羊廠之各第巴係七品頂帶。

一、應賞頂帶缺內有喇嘛缺出。以喇嘛補放。俗人缺出。以俗人補放。每屆年終。將陸革喇嘛俗人各名數造冊。咨報理藩院備查。

一、噶布倫缺出。在管番兵之戴琿、商上管賬目之仔琿、管事之商卓特巴內揀選。擬定正陪。請旨補放。

一、戴琿缺出。在新設管番兵之如琿內揀選。如不得人。再於邊缺營官內揀選。擬定正陪。請旨補放。不得以並未管兵之人充補。

一、四品仔琿、商卓特巴缺出。在五品管口糧之業爾倉巴、五品管刑名之協爾幫六品噶廈辦事之大中譯陸補。或濟仲喇嘛內揀選陸補。

一、五品業爾倉巴、協爾幫缺出。在外管事五品之希約第巴、管地方五品之朗仔轄、密本調補管馬廠之六品達木陞補。如係喇嘛缺出。仍以喇嘛坐補。

一、五品希約第巴、密本、達木缺出。在五品之大缺營官、五品之邊缺營官內調補。及六品之噶廈卓尼

爾內揀選陞補。

一、五品邊缺營官缺出。以五品之大缺營官調補。或以六品之中缺營官。六品之甲瑇。六品之噶廈大
中譯陞補。

一、五品大缺營官缺出。以七品小缺營官。七品小中譯陞補。

一、六品大中譯缺出。以六品之噶廈卓尼爾調補。或以七品小中譯陞補。

一、七品小缺營官缺出。准於東科爾及喇嘛內選用。

一、六品卓尼爾。七品小中譯缺出。選東科爾內地明白者挑補。

一、挑取六品卓尼爾。七品小中譯。七品小缺營官。須年至十八歲以上。方准當差。不得以幼小之人應
名充數。

一、布達拉管門。管糴糶。管草料。管帳房。管牛羊廠之各第巴。聽達賴喇嘛自行揀補。

一、布達拉喇嘛等。除業爾倉巴。希約第巴。向有喇嘛充補數缺。仍照舊例。按次補用外。其餘祇准在布
達拉及大小寺廟充當大小執事。將喇嘛揀選噶布倫之例。永行停止。

一、邊缺營官與外番接壤。約束番民。稽查出入。最關緊要。如果到任三年。辦理妥善。駕馭得宜。卽行更
換。記名以戴瑇等缺陞用。倘辦理不善。立即革退。

一、喇嘛補放營官。仍在達賴喇嘛前服役者。由駐藏大臣另派委員。前往該管地方代理。該喇嘛營官不得私行派人前往。

一、札什倫布商卓特巴缺出。以歲本森本喇嘛陞用。歲本缺出。以濟仲喇嘛陞用。森本缺出。以傳事之卓尼爾陞用。俱會同駐藏大臣給與印照。其該處營官各缺。仍照定例揀選充補。

一、札什倫布管茶葉管柴草等喇嘛聽班禪自行揀補。

一、察多木乍了類烏齊三處呼圖克圖管事之商卓特巴缺出。由該呼圖克圖揀選二三名。稟明駐藏大臣會同達賴喇嘛補放。

一、補放各缺。均由駐藏大臣會同達賴喇嘛選定後。會發清漢唐古忒三樣字印照。給與該番目收執。營官缺分

一、邊缺營官十四缺。共二十三名。黑人二十二名喇嘛一名江卡、與巴塘土司交界堆噶爾本、與納達交界哈拉烏蘇、與三十九族交界錯拉、

與布魯克帕克哩、與布魯克定結、與哲孟雄交界聶拉木、與廓爾喀交界濟隴、與廓爾喀交界官覺、與三暗補仁、與宗朗所屬博窩、與

密交工布碩卡、與波密絨轄爾、與廓爾喀交界達壩喀爾、與作木朗交界

一、大缺營官十缺，共十九名。黑人十五名，喇嘛四名。乃東、瓊結、貢噶爾、崙孜、桑昂曲宗、工布則崗、江

孜、昔孜、脅噶爾、納倉。

一、中缺營官四十二缺，共五十九名。黑人四十名，喇嘛十九名。洛隆宗、角木宗、打孜、桑薩、巴浪、仁本、仁

孜、朗嶺、宗喀、撒噶、作崗、達爾宗、江達、古浪、沃卡、冷竹宗、曲水、奪宗、雜

仁、茹拖、鎖莊、子奪、結登、直谷、碩板多、拉里、朗、沃隆、墨竹工、卡爾孜、文

札卡、轄魯、策堆得、達爾瑪、聶母、拉噶孜、嶺、納布、嶺喀爾、朗錯、羊八井、麻

爾江。

一、小缺營官二十四缺，共二十四名。黑人十四名，喇嘛十名。金東、拉載、撒拉、浪蕩、頗章、扎溪、色、堆

沖、汪墊、甲錯、拉康、瓊科爾結、蔡里、曲隆、札稱、折布嶺、札什、洛美、嘉爾布、

朗茹、哩烏、降、業黨、工布塘。

綠營

一、駐劄前藏遊擊一員、守備一員、千總二員、把總二員、外委五員、漢兵四百五十五名、後藏都司一員、

把總一員、外委一員、漢兵一百四十名。

一、駐劄江孜守備一員、外委一員、漢兵二十名、定日守備一員、把總一員、外委一員、漢兵四十名。

一、駐劄察木多遊擊一員、千總一員、把總一員、外委一員、江卡汛守備一員、把總一員、梨樹汛外委一員、石板溝汛把總一員、外委一員、昂地汛把總一員、碩板多汛千總一員、外委一員、拉里汛把總一員、外委一員、江達汛外委一員、共兵六百十八名。

一、駐藏大臣衙門應差兵丁每處三十名、遊擊八名、都司六名、守備二員、每員四名、駐藏司員四名、筆帖式二名、千總把總每員一名、前藏糧員看庫兵丁八名、每遇操演日期操演、毋許藉口應差、致有曠廢。

番營

一、戴琫六名、由達賴喇嘛處每名各撥給莊田一分、俾資辦公、如琫每名每年酌給銀三十兩、甲琫每名每年酌給銀二十兩、定琫每名每年酌給銀十四兩八錢、俱由商上支給、此項銀兩、令商上於春秋兩季備文送交駐藏大臣衙門、轉發該管將備會同戴琫、傳齊番目支領、如有侵漁剋扣情弊、一經查出、即行嚴參治罪。

一、額設番兵三千名、每名每年給與青稞二石五斗、分爲兩季、由該管將備會同戴琫等按名散給、如

有侵漁尅扣。一經查出。卽行嚴參治罪。遇有征調。再照征兵之例。每名每日由商上支給糈糶一觔。
一、如琫十二名。每名管兵二百五十名。甲琫二十四名。每名管兵一百二十五名。定琫一百二十名。每名管兵十五名。以上大小番目。俱由駐藏大臣會同達賴喇嘛。揀選年力精壯之人充補。發給委牌。倘有廢弛軍律者。卽行革退。

一、番兵三千名。內駐劄前藏一千名。駐劄後藏一千名。駐劄定日五百名。駐劄江孜五百名。
一、番兵三千名。每一千名。定以五分烏鎗。三分弓箭。二分刀矛。按期操演。

一、番兵服色。烏鎗兵穿紅褐背心。弓箭兵穿白褐背心。刀矛兵穿紅邊白褐背心。各書番兵二字。

一、番民挑定額兵者。俱由達賴喇嘛發給執照。免其一家充當烏拉徭役。以示體卹。如有事故革退。仍將執照繳回。

一、番兵三千名。俱係定額實數。該管將備及戴琫等。不得擅行役占。若例外私令跟隨服役。以致操防乏人。一經查出。卽行從嚴治罪。

一、東科爾中。如有情願充當番兵。及定琫兵目者。准其充伍。按次陞用。不許躐等超拔。番兵中。如有材技出衆者。不但拔補定琫。仍一體按次陞擢。至戴琫。不得以非東科爾世家阻其上進之路。
一、唐古忒兵丁。責令該管將備。督同番目。常川操演。駐藏大臣親爲較閱。技藝純熟者。酌加獎賞。併將

該管之番日記名陞擢技藝生疎者嚴加責懲屢教不悛卽行斥革該管之番目亦分別責降示懲
一、駐防將備俱以所管番兵優劣爲等由駐藏大臣於伊等年滿時查優等者咨送本省總督將軍提督准予保題仍照舊例陞用次等者咨部議敘劣等者卽行參革

一、前後藏定日江孜駐防官員由四川總督遵旨揀選頭等出色員弁派來分駐駐藏大臣秉公驗看如係以平庸之員充數卽駁回不得稍有徇隱

一、駐防將備弁兵如有營私舞弊欺凌唐古忒兵丁等事許戴琿等稟知駐藏大臣隨時嚴辦如該戴琿等操防怠惰苦累番民亦許將備等稟明究辦

一、現存火藥俟將次用竣約數兩年備用之時照例在藏酌造核計每年應需火藥數目由駐藏大臣衙門發給印票交噶布倫差派誠實番目前赴工布地方製造運解來藏倘有私造透漏及擾累該處番民等弊一經查出從嚴究辦

一、鉛丸火繩仍照向例由川省運解到藏以備操演

馬政

一、前藏聽差營馬六十四後藏聽差營馬二十四

一、自南墩迤西百里之江卡起至江達底塘止四十三塘共塘馬二百二十四

一、前藏迤西底塘起。至後藏定日止。新設番塘二十四處。共番馬九十八匹。貿易。

一、在藏居住貿易之巴勒布、克什米爾等。准其常川與販。查明該番回商頭等名數若干。造具清冊。交駐藏大臣衙門存案備查。

一、巴勒布每年准貿易三次。克什米爾每年准貿易一次。於前赴外番營販貨物時。該商頭呈明駐藏大臣。由何路行走。發給執照。以便稽查出入。

一、凡在藏貿易之外番商民。請領駐藏大臣照票出口。過江孜。定日。由該備弁查驗明確。始准放行。其自外番來藏者。亦由該備弁查明人數。報明駐藏大臣。一體按名註冊。以備查考。

一、唐古忒邊界番民。與接壤居住之巴勒布番民。就近易換鹽米。飭令各該管地方備弁營官。就近約束稽查。毋許私越。

一、濟隴、聶拉木兩處抽收米石鹽飭。及貨物到藏後。按包納稅。俱照舊例辦理。毋得稍有加增。

一、在藏商民等。或有爭占便宜。不安本分等事。聽駐藏大臣隨時查辦。如駐藏大臣衙門及各文武員弁衙門書吏通事人等。有藉端需索等弊。一經查出。即行從嚴參究懲治。

一、江孜。定日駐防備弁。如有藉端需索外番。及擾累商民。並或得錢縱容出入等弊。一經查出。立即從

嚴參革治罪。

錢法

一、鑄造銀錢。正面用漢字鑄乾隆寶藏四字。背面用唐古忒字鑄乾隆寶藏四字。

一、銀錢以重一錢、重五分兩項搭配鑄造。每紋銀一兩，准兌換一錢重新錢九圓，五分重新錢十八圓。其舊錢係一錢五分重者，亦一例兌換九圓，作為定價。

一、鑄錢銀兩由商上支發。該局鑄出錢文，易換銀兩。即將所換之銀，改鑄銀錢。每錢九圓，易銀一兩。所餘一錢，作為炭火傾銷之費。

一、番寨租賦。有以銀錢折交物件者。商上收納時，即照所定兌換之數，按新鑄舊鑄分別折收。不得稍有浮多。至採買各物，亦須公平交易，不得苦累商民。

一、鑄錢局內專派仔琿二名、濟仲喇嘛二名，以專責成。

一、監鑄局員。如果勤慎出力，由駐藏大臣保奏，倘敢徇私舞弊，即行嚴參辦理。

租賦

一、前後藏所出租賦，悉歸達賴喇嘛、班禪額爾德尼收用。至商上一切出納，應統歸駐藏大臣稽查總核。以杜商卓特巴等侵漁之弊。凡駐藏大臣衙門官用，以及換班官兵，皆不得於商上稍有侵那。

一、各寨租賦應按年徵收。清交商上。該商卓特巴立限嚴催。經徵之濟仲營官第巴等。年清年款。不得違限拖延。亦不許先一年預徵租賦。如各寨有逃亡絕戶。實在田畝拋荒者。即將該戶租賦豁免。俟有佃種之人。再行照例陞科。

差徭

一、藏內凡大族人戶。及大寺喇嘛。各處免差照票。一概停止。務使闔藏徭役均平。不致窮番苦累。如實有勞績者。達賴喇嘛告知駐藏大臣。方准給票。至新設番兵。於挑補兵缺時。仍准發給照票免差。出缺繳銷。

一、喇嘛番目人等私事往來。不得擅用烏拉。亦不得私發信票。如遇因公差遣。有必須烏拉之處。須稟明駐藏大臣及達賴喇嘛。發給用印照票。編定號數。始准應付。

邊防

一、濟隴、聶拉木、絨轄、喀爾達、薩喀、崑布、定結、怕克哩沿邊一帶。均已設立鄂博。駐藏大臣於巡查邊界之便。隨時派人堆砌石塊。不得日久廢弛。致有偷越。

一、江孜地方與定結、怕克哩、喀爾達相通。爲布魯克巴、哲孟雄等處部落來藏要路。且由江孜至薩迦溝行走。又可繞往聶拉木一帶邊界。其唐古忒營官。卽令該處駐防備弁管束。

一、定日地方爲聶拉木、濟隴、絨轄要路，又可通薩喀等處，其唐古忒營官，卽令該處駐防備弁管束。

一、定日地方遼闊，通絨轄之小路轄爾多，通宗喀之小路擦木達杏嶺，通聶拉木之小路古喇噶木炯，並宗喀，共計五處，每處設定瑋一名，番兵二十五名，卽於定日現設番兵五百名內，就近派撥安設，一律隨時操演。

一、喀爾達地方卡隘二處，一名撒甲嶺，一名春堆，均與廓爾喀相通，又定結地方卡隘一處，名擢拉山，與郭爾喀、哲孟雄兩路相通，又帕克哩地方卡隘三處，一名哲孟山，與布魯克巴相通，一名哈爾山，與布魯克巴小路相通，一名宗木山，與宗木相通，以上卡隘六處，均歸江孜守備派撥番兵分防巡守。

